

**ASO LULU, 7 AOKUSO 2013**

*Na nofoia le Nofoa e le Fofoga Fetalai i le itula e 9.00 i le taeao.*

Tatalo.

**MALELEGA MAI LE AO O LE MALO**

*Na fofogaina e le Fofoga Fetalai le Malelega mai Lana Afioga Mamalu O Le Ao o le Malo.*

**1. “TUSI mo:**

**Le Fofoga Fetalai:**

E tusa ai ma le Mataupu 59 o le Faavae o le Malo Tutoatasi o Samoa faapea Tulafono Tumau 95 a le Palemene ua ou tuuina atu nei le maliega i le Fono Aoao Faitulafono e iloiloaina ai Tulafono Tau Faaofi ua faaalai iinei:

1. Tulafono Tau Faaofi e Soloia ai le Tulafono o le Faalapotopotoga o Oloa Tau Faatoaga 2013.

**TUUIINA ATU** i lou nei Lima i lenei Aso Lua 6 o Aukuso i le tausaga 2013.

**(Sainia): Tui Atua Tupua Tamasese Efi**  
**O LE AO O LE MALO.**

**2. TUSI FAAMAONIA O LE TULAGA FAANATINATI.**

E tusa ai ma aiaiga o le Tulafono Tumau 99(2), **O AU, TUI ATUA TUPUA TAMASESE EFI, O LE AO O LE MALO,** ua ou tuuina atu nei le Tusi Faamaonia o le Tulaga Faanatinati o le Tulafono Tau Faaofi ua faaali atu iinei mo le tagofia e le Fono Aoao Faitulafono i lana Fonotaga o le a usua i le Aso Lua, 6 Aukuso 2013.

1. Tulafono Tau Faaofi e Soloia ai le Tulafono o le Faalapotopotoga o Oloa Tau Faatoaga 2013.

**TUUINA ATU** i lou nei Lima i lenei Aso Lua 6 o Aukuso i le tausaga 2013.

**(Sainia): Tui Atua Tupua Tamasese Efi  
OLE AO O LE MALO.**

**FOFOGA FETALAI:** E manatu o lea ua tatou taunuu mai i lenei taeao fou ma e lagona ua lalago faatasi le paia o le Maota e pei o le igoa-ipu a Sa-Tupua, ua fetai ai ma uso e pei o le igoa-ipu a Tauiliili, ua taumailelei foi e pei o le igoa-ipu a Leuluaiailii.

E manatu o moomooga alofa na ma e faatalofa atu i le paia o le Maota i lenei taeao fou i lo outou alafai mai i faguga lelei. Ua tatou taunuu mai i le faasologa o a tatou galuega i lenei aso ma le faasologa o a tatou galuega tuua, ua faamalo le folau. E ofo alofa atu ai i le paia o le Maota i ona tulaga faalupe, aua e talitonu o lo o aoina le masina ma ua vaavaai atu sulu o le tino o lo o tumau lo outou soifua manuia.

E faapena foi ona faatalofa atu i le paia ua sasao i lo tatou Maota, le paia i Faauluuluga o Matagaluega ma Faalapotopotoga; alo mai o le a faagasolo a tatou galuega i lenei aso.

E manatu foi ona o lea tatou te faatasi ma le paia ma le mamalu o tupu ma ee, o tupu ma tamalii, o alo ma fanau a lo tatou atunuu, o lo o faagasolo pea a tatou polokalame e pei ona faailoaina i le aso ananafi. E talitonu o le a mau le toovae ma po le fala, a o le a alo le Palemene i fuafuaga o lenei aso. E faamalo atu le soifua manuia, malo le onosai.

#### **TULAFONO TAU FAAOFI O TEUTEUGA O LE TULAFONO O TAAVALE FEOAI I ALA TETELE 2013 – iloiloga auiliili**

**FOFOGA FETALAI:** E tusa ai ma le Tulafono Tumau 106, e tatau ona faamaonia muamua e le Fono Aoao le Lipoti a le Komiti i le Tulafono Tau Faaofi ona avanoa ai lea o le iloiloga auiliili o le Tulafono Tau Faaofi.

Tulai mai lau Afioga i le Taitaifono o le Komiti o Galuega, Felauaiga ma Siosiomaga.

**Tofa TUSA MISI TUPUOLA (Taitaifono, Komiti o Galuega, Felauaiga ma Siosiomaga):** Lau Afioga i le Fofoga Fetalai, o le a taoto ia sa faaifogata o le vao filifili o le taeao i paia faalagia o Samoa ne i ou paotia ona toia lea o au i mala o le vaosa, aua e faigata o lele ua aina tiamalua o le taeao i le paia mauuluga o le Palemene o Samoa. Ua afio lau Afioga i le Palemia o le Malo Tutoatasi o Samoa, ua afio foi a outou Afioga i Minisita o le Kapeneta, afio lau Afioga i le Taitai o le Itu Agai ma sui usufono mamalu uma o le Palemene o Samoa ua potopoto.

O lea foi ua maea lau Afioga i le Fofoga Fetalai ona e molimoli lapalapa o Malo i lenei taeao se i o tatou ailaoina ma o tatou faamanusina le agalelei le mavae o lo tatou Tapaau Sili i le lagi ona o le faamoemoe ua taunuu i lenei taeao fou.

Ua ou tulai atu ma le agaga faaaloalo lau Afioga i le Fofoga Fetalai ou te faatu le lafo, *Ina ia faamaonia e lenei Fono Aoao le Lipoti a le Komiti o lo o fautuaina ai ina ia faagasolo le Tulafono Tau Faaofi o Teuteuga o le Tulafono o Taavale Feoi i Ala Tetele 2013 faatasi ma le Teuteuga.*

*Faaluaina e le sui usufono mo Alataua Sisifo ma le sui usufono mo Palauli.*

*Na faamaonia le lafo.*

**FOFOGA FETALAI:** E faasilasila atu ua faamaonia nei e le Fono Aoao le Lipoti a le Komiti o Galuega, Felauaiga ma Siosiomaga i le Tulafono Tau Faaofi o Teuteuga o le Tulafono o Taavale Feoi i Ala Tetele 2013.

O le a sagai atu le Fono Aoao i le iloiloga auiliili o le Tulafono Tau Faaofi o Teuteuga o le Tulafono o Taavale Feoi i Ala Tetele 2013.

E tusa ai ma le Tulafono Tumau 102, e amata le iloiloga auiliili o le Tulafono Tau Faaofi i le Fuaiupu 2.

#### **FUAIUPU 2: Teuteuga o le Fuaiupu 40.**

**FOFOGA FETALAI:** O lo o i ai le Teuteuga i le Fuaiupu 2 e pei ona faaalua i le Pepa Faaopoopo o Galuega.

Tulai mai le Taitaifono o le Komiti o Galuega, Felauaiga ma Siosiomaga.

**Tofa TUSA MISI TUPUOLA:** Lau Afioga i le Fofoga Fetalai ou te faatu le Teuteuga i le Fuaiupu 2 e faapea:

#### **“TEUTEUGA:**

- i) Ia soloia le faafuaiupu (3C);
- ii) Ia toe faanumera le faafuaiupu (3D) tuai e avea ma faafuaiupu (3C).”

O lenei Teuteuga lau Afioga ua fautuaina ona o feteenaiga faale-Faavae ma le tutoatasi o le pule faa-Faamasinoga e ao ona amanaia ma tausiona pea e pei ona lagolagoina ma ioeina e le Afioga i le Loia Sili a le Malo.

Ma le faaaloalo lava.

*Faamaonia le Teuteuga.*

*Na faamaonia le Fuaiupu 2 e pei ona teuteuina.*

**FUAIUPU 3: Soloia o le Fuaiupu 40D.**

*Faamaonia.*

**FUAIUPU 4: Teuteuga o le Fuaiupu 40E.**

*Faamaonia.*

**FUAIUPU 5: Teuteuga o le Fuaiupu 40K.**

*Faamaonia.*

**FUAIUPU 1 MA LE IGOA:**

**FUAIUPU 1: Igoa puupuu ma le amataga.**

**IGOA: Teuteuga o le Tulafono o Taavale Feoi i Ala Tetele 2013.**

*Faamaonia.*

*Na faagasolo le Tulafono Tau Faaofi o Teuteuga o le Tulafono o Taavale Feoi i Ala Tetele 2013 faatasi ma le Teuteuga.*

**TULAFONO TAU FAAOFI O TEUTEUGA O LE  
FAAVAE (NU.2) 2012 – iloiloga auiliili**

**FOFOGA FETALAI:** E tusa ai ma le Tulafono Tumau 106, e tatau ona faamaonia muamua e le Fono Aoao le Lipoti a le Komiti i le Tulafono Tau Faaofi ona avanoa ai lea o le iloiloga auiliili o le Tulafono Tau Faaofi.

Tulai mai le Afioga i le Taitaifono o le Komiti o Tupe Maua ma Tupe Totogi.

**Susuga Hon PAPALIITELE NIKO LEE HANG (Taitaifono, Komiti o Tupe Maua ma Tupe Totogi):** Lau Afioga i le Fofoga Fetalai ou te faatu le lafo, *Ina ia faamaonia e lenei Fono Aoao le Lipoti a le Komiti o lo o fautuaina ai ina ia faagasolo le Tulafono Tau Faaofi o Teuteuga o le Faavae (Nu.2) 2012 faatasi ma Faasaoga.*

*Faaluaina e le sui usufono mo Aleipata Itupa i Lalo.*

*Na faamaonia le lafo.*

**FOFOGA FETALAI:** E faasilasila atu ua faamaonia nei e le Fono Aoao le Lipoti a le Komiti o Tupe Maua ma Tupe Totogi i le Tulafono Tau Faaofi o Teuteuga o le Faavae (Nu.2) 2012.

O le a sagai atu le Fono Aoao i le iloiloga auiliili o le Tulafono Tau Faaofi o Teuteuga o le Faavae (Nu.2) 2012.

E tusa ai ma le Tulafono Tumau 102, e amata le iloiloga auiliili o le Tulafono Tau Faaofi i le Fuaiupu 2.

**FUAIUPU 2: Mataupu 83 ua teuteuina.**

**FOFOGA FETALAI:** O lo o i ai le Faasaoga i le Fuaiupu 2 e pei ona faaalua i le Pepa Faaopoopo o Galuega.

Tulai mai le Taitaifono o le Komiti o Tupe Maua ma Tupe Totogi.

**Susuga Hon PAPALIITELE NIKO LEE HANG:** Lau Afioga i le Fofoga Fetalai ou te faatu le Faasaoga i le Fuaiupu 2 e faapea:

**“FAASAOGA:**

Ia aveese le upu “**Aoao**” o lo o aliae mai ina ua tuanai le upu “**Suetusi**” a o lumanai le upu “**ma**”, ma suia i le upu “**Sili**” ma faitauina ai e faapea:

**“(h) Pule ma Suetusi Sili, ma isi tagata ofisa ma tagata faigaluega o le Ofisa o Suetusi ua faamaotiina i lalo o le Mataupu 97; po o”**”.

*Faamaonia le Faasaoga.*

*Na faamaonia le Fuaiupu 2 e pei ona faasaoina.*

**FUAIUPU 3: Mataupu 97 ua suia.**

**FOFOGA FETALAI:** O lo o i ai le Faasaoga i le Fuaiupu 3 e pei ona faaalua i le Pepa Faaopoopo o Galuega.

Tulai mai le Taitaifono o le Komiti o Tupe Maua ma Tupe Totogi.

**Susuga Hon PAPALIITELE NIKO LEE HANG:** Lau Afioga i le Fofoga Fetalai ou te faatu le Faasaoga i le Fuaiupu 3 e faapea:

**“FAASAOGA:**

Ia aveesea le upu “**Aoao**” o lo o aliae mai i so o se vaega o le Fuaiupu ma suia i le upu “**Sili**” ma faitauina ai le faaulutala o le tofi e faapea:

**“Pule ma Suetusi Sili”**”.

*Faamaonia le Faasaoga.*

*Na faamaonia le Fuaiupu 3 e pei ona faasaoina.*

**FUAIUPU 4: Mataupu fou 97 ua faaopoopo.**

**FOFOGA FETALAI:** O lo o i ai le Faasaoga i le Fuaiupu 4 e pei ona faaalua i le Pepa Faaopoopo o Galuega.

Tulai mai le Taitaifono o le Komiti o Tupe Maua ma Tupe Totogi.

**Susuga Hon PAPALIITELE NIKO LEE HANG:** Lau Afioga i le Fofoga Fetalai ou te faatu le Faasaoga i le Fuaiupu 4 e faapea:

**“FAASAOGA:**

Ia aveese le upu “**Aoao**” o lo o aliae mai i so o se vaega o le Fuaiupu ma suia i le upu “**Sili**” ma faitauina ai le faaulutala o le tofi e faapea:

**“Pule ma Suetusi Sili”**”.

*Faamaonia le Faasaoga.*

*Na faamaonia le Fuaiupu 4 e pei ona faasaoina.*

**FUAIUPU 5: Mataupu 98 ua suia.**

**FOFOGA FETALAI:** O lo o i ai le Faasaoga i le Fuaiupu 5 e pei ona faaalua i le Pepa Faaopoopo o Galuega.

Tulai mai le Taitaifono o le Komiti o Tupe Maua ma Tupe Totogi.

**Susuga Hon PAPALIITELE NIKO LEE HANG:** Lau Afioga i le Fofoga Fetalai ou te faatu le Faasaoga i le Fuaiupu 5 e faapea:

**“FAASAOGA:**

Ia aveesea le upu “**Aoao**” o lo o aliae mai i so o se vaega o le Fuaiupu ma suia i le upu “**Sili**” ma faitauina ai le faaulutala o le tofi e faapea:

**“Pule ma Suetusi Sili”**”.

*Faamaonia le Faasaoga.*

*Na faamaonia le Fuaiupu 5 faatasi ma le faasaoga.*

**FUAIUPU 6: Mataupu 99 ua suia.**

**FOFOGA FETALAI:** O lo o i ai le Faasaoga i le Fuaiupu 6 e pei ona faaalua i le Pepa Faaopoopo o Galuega.

Tulai mai le Taitaifono o le Komiti o Tupe Maua ma Tupe Totogi.

**Susuga Hon PAPALIITELE NIKO LEE HANG (Taitaifono o le Komiti o Tupe Maua ma Tupe Totogi):** Lau Afioga i le Fofoga Fetalai ou te faatu le Teuteuga i le Fuaiupu 6 e faapea:

**“FAASAOGA:**

Ina ia aveesea le upu “**Aoao**” o lo o aliae mai i so o se vaega o le Fuaiupu ma suia i le upu “**Sili**” ma faitauina ai le faaulutala o le tofi e faapea:

**“Pule ma Suetusi Sili.””**

*Faamaonia le Faasaoga.*

*Na faamaonia le Fuaiupu 6 e pei ona faasaoina.*

**FUAIUPU 7: Mataupu fou 99A e oo i le 99F ua faaopoopo.**

**FOFOGA FETALAI:** O lo o i ai le Faasaoga i le Fuaiupu 7 e pei ona faaalua i le Pepa Faaopoopo o Galuega.

Tulai mai lau Afioga i le Taitaifono o le Komiti o Tupe Maua ma Tupe Totogi.

**Susuga Hon PAPALIITELE NIKO LEE HANG:** Lau Afioga i le Fofoga Fetalai ou te faatu le Faasaoga i le Fuaiupu 7 e faapea:

**“FAASAOGA:**

Ia aveesea le upu “**Aoao**” o lo o aliae mai i so o se vaega o le Fuaiupu ma suia i le upu “**Sili**” ma faitauina ai le faaulutala o le tofi e faapea:

**“Pule ma Suetusi Sili””.**

*Faamaonia le Faasaoga.*

*Na faamaonia le Fuaiupu 7 e pei ona faasaoina.*

**FUAIUPU 8: Aiaiga faasaoina.**

**FOFOGA FETALAI:** O lo o i ai le Faasaoga i le Fuaiupu 8 e pei ona faaalua i le Pepa Faaopoopo o Galuega.

Tulai mai lau Afioga i le Taitaifono o Tupe Maua ma Tupe Totogi.

**Susuga Hon PAPALIITELE NIKO LEE HANG:** Lau Afioga i le Fofoga Fetalai ou te faatu le Faasaoga i le Fuaiupu 8 e faapea:

**“FAASAOGA:**

Ia aveesea le upu “**Aoao**” o lo o aliaie mai i so o se vaega o le Fuaiupu ma suia i le upu “**Sili**” ma faitauina ai le faaulutala o le tofi e faapea:

**“Pule ma Suetusi Sili”**”.

*Faamaonia le Faasaoga.*

*Na faamaonia le Fuaiupu 8 e pei ona faasaoina.*

**FUAIUPU 1 MA LE IGOA:**

**FUAIUPU 1: Igoa puupuu ma le amataga.**

**IGOA: Teuteuga o le Faavae (Nu.2) 2012.**

**FOFOGA FETALAI:** O lo o i ai le Faasaoga i le Fuaiupu 1 ma le Igoa e pei ona faaalua i le Pepa Faaopoopo o Galuega.

Tulai mai lau Afioga i le Taitaifono o le Komiti o Tupe Maua ma Tupe Totogi.

**Susuga Hon PAPALIITELE NIKO LEE HANG:** Lau Afioga i le Fofoga Fetalai ou te faatu le Faasaoga i le Fuaiupu 1 ma le Igoa e faapea:

**“FAASAOGA:**

Ia aveese le **fuainumera 2012** ma suia i le **fuainumera 2013** ma faitauina ai le Igoa o le Tulafono e faapea:

**Tulafono o Teuteuga o le Faavae (Nu.2) 2013.”**



*Faamaonia le Faasaoga.*

*Na faamaonia le Fuaiupu 1 ma le Igoa e pei ona faasaoina.*

*Na faagasolo le Tulafono Tau Faaofi o Teuteuga o le Faavae (Nu.2) 2013 faatasi ma Faasaoga.*

**TULAFONO TAU FAAOFI O LE SUEINA  
O TUSI 2012 – iloiloga auiliili**

**FOFOGA FETALAI:** E tusa ai ma le Tulafono Tumau 106, e tatau ona faamaonia muamua e le Fono Aoao le Lipoti a le Komiti i le Tulafono Tau Faaofi ona avanoa ai lea o le iloiloga auiliili o le Tulafono Tau Faaofi.

Tulai mai le Afioga i le Taitaifono o le Komiti o Tupe Maua ma Tupe Totogi.

**Susuga Hon PAPALIITELE NIKO LEE HANG:** Lau Afioga i le Fofoga Fetalai ou te faatu le lafo, *Ina ia faamaonia e lenei Fono Aoao le Lipoti a le Komiti o lo o fautuaina ai, Ina ia faagasolo le Tulafono Tau Faaofi o le Sueina o Tusi 2012 faatasi ma Teuteuga ma Faasaoga.*

*Faaluaina e se tasi o sui usufono mo Faasaleleaga Nu. 1, Afioga Hon Gatoloaifaana Amataga Alesana Gidlow ma le sui usufono mo Aleipata Itupa i Lalo.*

*Na faamaonia le lafo.*

**FOFOGA FETALAI:** E faasilasila atu ua faamaonia nei e le Fono Aoao le Lipoti a le Komiti o Tupe Maua ma Tupe Totogi i le Tulafono Tau Faaofi o le Sueina o Tusi 2012.

O le a sagai atu le Fono Aoao i le iloiloga auiliili o le Tulafono Tau Faaofi o le Sueina o Tusi 2012.

E tusa ai ma le Tulafono Tumau 102, e amata le iloiloga auiliili o le Tulafono Tau Faaofi i le Fuaiupu 2.

A o lei amatalia le iloiloga auiliili, ou te tapa le Taitaifono o le Komiti o Tupe Maua ma Tupe Totogi mo le Faasaoga faalauaitetele i le Tulafono Tau Faaofi mo le faasaoina o lo o tatou taimi.

**Susuga Hon PAPALIITELE NIKO LEE HANG:** Lau Afioga i le Fofoga Fetalai ou te faatu le Faasaoga Faalauaitetele i le Tulafono Tau Faaofi e faapea:

**“FAASAOGA:**

Ia aveesea le upu “**Aoao**” mai so o se vaega o le Tulafono Tau Faaofi o aliali mai ai ma faitauina ai le tofi o le Suetusi e faapea:

**“Pule ma Suetusi Sili.”**”

*Faamaonia le Faasaoga.*

*Na faamaonia le Faasaoga Faalauaitete e pei ona faasaoina.*

**FUAIUPU 2: Faamatalaina o uiga o upu.**

*Faamaonia.*

**FUAIUPU 3: Faamoemoe o lenei Tulafono.**

*Faamaonia.*

**FUAIUPU 4: Faaaogaina o le Tulafono i fafo atu o le atunuu.**

*Faamaonia.*

**FUAIUPU 5: Tulafono e noatia ai le Malo.**

*Faamaonia.*

**FUAIUPU 6: O isi Tulafono e ao ona faitauina i le noatia ma le fai fuafua i lenei Tulafono.**

*Faamaonia.*

**FUAIUPU 7: Taiala faataatitia mo le tofiaina o le Pule.**

*Faamaonia.*

**FUAIUPU 8: Taulegavaaina.**

*Faamaonia.*

**FUAIUPU 9: Tautinoga o le tofi e faia e le Pule.**

*Faamaonia.*

**FUAIUPU 10: Totogi, alauni ma isi faamanuiaga o le Pule.**

*Faamaonia.*

**FUAIUPU 11: Faavaeina o le Ofisa o Suetusi.**

**FOFOGA FETALAI:** Lau Afioga i le Fofoga Fetalai ou te faatu le Teuteuga i le Fuaiupu 11(1)(b) e faapea:

**“TEUTEUGA:**

- i) Ia aveese le upu **“Sui Pule”** o lo o aliae mai i le fuaiupu 11(b) ma suia i le upu **“Suetusi Lagolago”** ma faitauina ai e faapea:

**“11(1)(b) le Suetusi Lagolago; ma”**

- ii) Ia aveese le upu **“Sui Pule”** o lo o aliae mai i le fuaiupu 11(3) ma suia i le upu **“Suetusi Lagolago”** ma faitauina ai e faapea:

**“11(3) E i ai i le Pule le malosiaga atoatoa e faafaigaluega ai, lea e aofia ai malosiaga e faatulaga ai, tofia, pulea ma faatulaga totogi o le Suetusi Lagolago, tagata ofisa, tagata faigaluega ma isi tagata o le Ofisa o Suetusi i luga o tuutuuga ua manatu le Pule ua talafeagai ai.””**

*Faamaonia le Teuteuga.*

*Na faamaonia le Fuaiupu 11 e pei ona teuteuina.*

**FUAIUPU 12: Malosiaga lautele.**

**FOFOGA FETALAI:** O lo o i ai le Teuteuga i le Fuaiupu 12 e pei ona faaalia i le Pepa Faaopoopo o Galuega.

Tulai mai lau Afioga i le Taitaifono o le Komiti o Tupe Maua ma Tupe Totogi.

**Susuga Hon PAPALIITELE NIKO LEE HANG:** Lau Afioga i le Fofoga Fetalai ou te faatu le Teuteuga i le Fuaiupu 12 e faapea:

**“TEUTEUGA:**

Ia faaofi upu “**ma faasuetusi**” i le tuanai ai o upu “**faatausi tusi**” e pei ona aliaie mai i le parakalafa (c) ma faitauina ai le parakalafa (c) e faapea:

**“12(c). taiala faataatitia ma faiga masani faatausi tusi ma faasuetusi ua taliaina faalauaitele; ma”**”

*Faamaonia le Teuteuga.*

*Na faamaonia le Fuaiupu 12 e pei ona teuteuina.*

**FUAIUPU 13: Malosiaga faaopoopo.**

*Faamaonia.*

**FUAIUPU 14: Galuega tauave po o malosiaga i lalo o isi Tulafono.**

*Faamaonia.*

**FUAIUPU 15: Tusi tau pulega.**

*Faamaonia.*

**FUAIUPU 16: Tofiaina o tagata e faia galuega faasuetusi.**

*Faamaonia.*

**FUAIUPU 17: Tuuina atu o malosiaga.**

*Faamaonia.*

**FUAIUPU 18: Faamaoniga ma le toe faafoi atu o faamatalaga o tupe maua ma tupe alu.**

*Faamaonia.*

**FUAIUPU 19: Talosaga tusia, suesuega ma faamaoniga o talosaga mo tupe totogi.**

*Faamaonia.*

**FUAIUPU 20: Malosiaga e maua mai ai faamatalaga.**

**FOFOGA FETALAI:** O lo o i ai le Teuteuga i le Fuaiupu 20 e pei ona faaalia i le Pepa Faaopoopo o Galuega.

Tulai mai lau Afioga i le Taitaifono o le Komiti o Tupe Maua ma Tupe Totogi.

**Susuga Hon PAPALIITELE NIKO LEE HANG:** Lau Afioga i le Fofoga Fetalai ou te faatu le Teuteuga i le Fuaiupu 20(6) e faapea:

**“TEUTEUGA:**

Ia aveese le upu **“5 iunite tau”** o lo o aliae mai i le Fuaiupu 20(6) ma suia i le upu **“50 iunite tau”** ma faitauina ai e faapea:

**“20(6). O se tagata o ia lea, e aunoa ma se mafuaaga talafeagai, ua lē mafaia i totonu o le 14 aso o le mauaina o le faatonuga ia tausisia se faatonuga i lalo o lenei fuaiupu, ua ia faia o se soligatulafono ma e noatia i luga o se moliaga ua faamaonia faaletulafono i se sala tupe e lē silia le 50 iunite tau faasalaga po o le nofosala i le falepuipui mo se vaitaimi e lē silia le lua (2) tausaga, po o faasalaga uma e lua.”**”

*Faamaonia le Teuteuga.*

*Na faamaonia le Fuaiupu 20 e pei ona teuteuina.*

**FUAIUPU 21: Avanoa o le Pule i teugatupe, faamatalaga, tupe ma meatotino.**

*Faamaonia.*

**FUAIUPU 22: Tiute tauave e tuuina atu ai faamatalaga e suia ai isi tiute tauave ma aia tatau.**

*Faamaonia.*

**FUAIUPU 23: E le mafai ona talosagaina tulaga aloaia tau tomai faapitoa faaletulafono.**

*Faamaonia.*

**FUAIUPU 24: Faailoaina atu o faamatalaga e le Pule.**

*Faamaonia.*

**FUAIUPU 25: Faamataga agatapuia.**

**FOFOGA FETALAI:** O lo o i ai le Teuteuga i le Fuaiupu 25 e pei ona faaalua i le Pepa Faaopoopo o Galuega.

Tulai mai lau Afioga i le Taitaifono o le Komiti o Tupe Maua ma Tupe Totogi.

**Susuga Hon PAPALIITELE NIKO LEE HANG:** Lau Afioga i le Fofoga Fetalai ou te faatu le Teuteuga i le Fuaiupu 25 e faapea:

**“TEUTEUGA:**

Ia aveese le upu **“Sui Pule”** o lo o aliaie mai i le Fuaiupu 25(1)(c) ma suia i upu **“Suetusi Lagolago”** ma faitauina ai e faapea:

**“25(1)(c). o le Suetusi Lagolago po o se tagata ofisa po o se tagata faigaluega o le Ofisa o Suetusi;”**

*Faamaonia le Teuteuga.*

*Na faamaonia le Fuaiupu 25 e pei ona teuteuina.*

**FUAIUPU 26: Malosiaga e faia ai totogi faaopoopo.**

*Faamaonia.*

**FUAIUPU 27: Malosiaga e toe faaola mai ai totogi faaopoopo e le i faamalieina ona totogi.**

*Faamaonia.*

**FUAIUPU 28: Talosaga tetee e faasaga i totogi faaopoopo.**

*Faamaonia.*

**FUAIUPU 29: Sueina Faasuetusi o aseta a le Malo, aitalafu a le Malo, tupe faavae mai tupe maua a le Malo ma tupe a le Malo.**

*Faamaonia.*

**FUAIUPU 30: Sueina faasuetusi o faamatalaga tau tupe a faalapotopotoga a le Malo ma faalapotopotoga e fesootai ai.**

*Faamaonia.*

**FUAIUPU 31: Sueina faasuetusi o lala o faalapotopotoga a le Malo.**

*Faamaonia.*

**FUAIUPU 32: Pulega e mafai ona tali atu a faalapotopotoga a le Malo ma lala o faalapotopotoga ua maea ona sueina faasuetusi.**

*Faamaonia.*

**FUAIUPU 33: Tuuina atu o faamatalaga tau tupe e pulega e mafai ona tali atu.**

*Faamaonia.*

**FUAIUPU 34: Galuega tauave a faalapotopotoga e fesootai i ai.**

*Faamaonia.*

**FUAIUPU 35: Sueina faasuetusi o faalapotopotoga e le o pulea e se faalapotopotoga a le Malo.**

*Faamaonia.*

**FUAIUPU 36: Sueina faasuetusi o pulega faaletulafono ma pulega i totonu o le atunuu.**

*Faamaonia.*

**FUAIUPU 37: Talosaga mo le sueina o tusi.**

*Faamaonia.*

**FUAIUPU 38: Sueina faasuetusi mo sailiiliga po o suesuega.**

*Faamaonia.*

**FUAIUPU 39: Faamatalaga e uiga i lipoti fuafuaina o le sueina o tusi.**

*Faamaonia.*

**FUAIUPU 40: Lipoti o le sueina o tusi a faalapotopotoga a le Malo.**

*Faamaonia.*

**FUAIUPU 41: Lipoti o le sueina o tusi i luga o so o se sailiiliga po o se suesuega.**

*Faamaonia.*



**FUAIUPU 42: Faataatiaina o lipoti o le sueina o tusi i luga o le Laulau-a-Fono a le Fono Aoa Fautulafono.**

*Faamaonia.*

**FUAIUPU 43: Sueina faasuetusi o faatinoga o galuega.**

*Faamaonia.*

**FUAIUPU 44: Manaoga mo le sueina faasuetusi o faatinoga o galuega.**

*Faamaonia.*

**FUAIUPU 45: Manaoga mo le sueina faasuetusi o siosiomaga tau galuega.**

*Faamaonia.*

**FUAIUPU 46: Manaoga mo le sueina faasuetusi o Faamatalaga Faatekonolosi.**

*Faamaonia.*

**FUAIUPU 47: Sueina faasuetusi o faatinoga o galuega a faalapotopotoga a le Malo.**

*Faamaonia.*

**FUAIUPU 48: Malosiaga faapitoa e suesueina ai teugatupe tumaoti i le faletupe.**

*Faamaonia.*

**FUAIUPU 49: Tuusaunoaga mai noataga.**

**FOFOGA FETALAI:** O lo o i ai le Teuteuga a le Komiti i le Fuaiupu 49 e pei ona faaalia i le Pepa Faaopoopo o Galuega.

Tulai mai le Taitaifono o le Komiti o Tupe Maua ma Tupe Totogi.

**Susuga Hon PAPALIITELE NIKO LEE HANG:** Lau Afioga i le Fofoga Fetalai ou te faatu le Teuteuga i le Fuaiupu 49 e faapea:

**“TEUTEUGA:**

Ia aveese le upu “Sui Pule” o lo o aliae mai i le Fuaiupu 49 ma suia i upu “Suetusi Lagolago” ma faitauina ai e faapea:

**“49. E le noatia le Pule ma Suetusi Sili, Suetusi Lagolago ma so o se tagata ofisa po o se tagata faigaluega o le Ofisa o Suetusi, po o so o se isi lava tagata o lo o galue e avea ma sui o, po o faatasi ai ma le pile faataga a le Pule, mo so o se mea ua faia po o ua le faia, po o ua avea e faapea na faia pe leai foi i le agaga lelei i le faataunuina o galuega tauavae, tiute ma malosiaga i lalo o lenei Tulafono, po o so o se isi lava Tulafono.””**

*Faamaonia le Teuteuga.*

*Faamaonia le Fuaiupu 49 e pei Teuteuina.*

**FUAIUPU 50: Faaiuga o feeseeseaiga.**

*Faamaonia.*

**FUAIUPU 51: Totogiina o tupe a le Malo pe afai ua leiloa po o ua faaleagaina lisiti.**

*Faamaonia.*

**FUAIUPU 52: Totogifuapauina o le sueina o tusi.**

*Faamaonia.*

**FUAIUPU 53: Tulafono Faatonutonu.**

*Faamaonia.*

**FUAIUPU 54: Soligatulafono lautele ma faasalaga.**

*Faamaonia.*

**FUAIUPU 55: Soloia ma teuteuga faatupulaia.**

*Faamaonia.*

**FUAIUPU 56: Tuuina atu o malosiaga i lalo o le Tulafono.**

*Faamaonia.*

**FUAIUPU 57: Tofiga ua faia i lalo o le Tulafono.**

*Faamaonia.*

**FUAIUPU 58: Totogifuapauina ua faia i lalo o le Tulafono.**

*Faamaonia.*

**FUAIUPU 59: Faasinomaga i le “Pule ma Suetusi Sili” i totonu o isi Tulafono.**

*Faamaonia.*

**FUAIUPU 60: O le puipuia o aia tatau o tagata faigaluega o le Ofisa o Suetusi.**

*Faamaonia.*

**FUAIUPU 61: Tulafono Faatonutonu tau soloaiga.**

*Faamaonia.*

**FAAMATALAGA.**

*Faamaonia.*

**FUAIUPU 1 MA LE IGOA:**

**FUAIUPU 1: Igoa puupuu ma le amataga.**

**IGOA: Tulafono Tau Faaofi o le Sueina o Tusi 2012.**

**FOFOGA FETALAI:** O lo o i ai le Faasaoga a le Komiti i le Fuaiupu 1 ma le Igoa e pei ona faaalia i le Pepa Faaopoopo o Galuega.

Tulai mai le Afioga i le Taitaifono o le Komimiti o Tupe Maua ma Tupe Totogi.

**Susuga Hon PAPALIITELE NIKO LEE HANG:** Lau Afioga i le Fofoga Fetalai, ou te faatu le Faasaoga i le Fuaiupu 1 ma le Igoa e faapea:

**“FAASAOGA:**

Ia aveese le fuainumera “2012” ma suia i le fuainumera “2013” ma faitauina ai le Igoa o le Tulafono e faapea:

**“Tulafono Tau Faaofi o le Sueina o Tusi 2013.””**

*Faamaonia le Faasaoga.*

*Faamaonia le Fuaiupu 1 ma le Igoa e pei ona faasaoina.*

*Na faagasolo le Tulafono Tau Faaofi o le Sueina o Tusi 2013 faatasi ma Teuteuga ma Faasaoga.*

**FOFOGA FETALAI:** E maitau atu le Nofoa e tau le lagona le leo o le itu lea. Afai ua lagona sina mea o la e vevela le tatou vai vevela i fafo, o lea foi o le a latalata i le tatou taimi malolo. E lelei le fesili atu ma outou tali mai, ae e pei e le paleni le tatou mea pe afai na o le fai atu lava ae outou nofonono mai. Na ona faamanatu atu.

**TULAFONO TAU FAAOFI E SOLOIA AI LE TULAFONO O LE  
FAALAPOTOPOTOGA O OLOA TAU FAATOAGA 2013  
– faitauga muamua.**

**FOFOGA FETALAI:** Tulai mai lau Afioga i le Minisita o Tupe.

**Afioga Hon FAUMUINA TIATIA FAAOLATANE LIUGA (Minisita o Tupe):** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi e Soloia ai le Tulafono o le Faalapotopotoga o Oloa Tau Faatoaga 2013 i lona faitauga muamua.*

*Faaluaina e le Minisita mo Tina ma Tamaitai, Atinae o Nuu ma Afioga ma Agafesootai.*

*Na faamaonia le lafo ma faitauina le Tulafono Tau Faaofi e Soloia ai le Tulafono o le Faalapotopotoga o Oloa Tau Faatoaga 2013 i lona faitauga muamua.*

**TULAFONO TAU FAAOFI E SOLOIA AI LE TULAFONO O LE  
FAALAPOTOPOTOGA O OLOA TAU FAATOAGA 2013  
– faitauga faalua.**

**FOFOGA FETALAI:** Talu ai ua ou taulimaina nei le Tusi Faanatinati ua maea ona sainia e Lana Afioga Mamalu, O le Ao o le Malo, o lea o le a sauni atu loa le Fono Aoaofa Faitulafono mo le faitauga faalua o le Tulafono Tau Faaofi.

Tulai mai lau Afioga i le Minisita o Tupe.

**Afioga Hon FAUMUINA TIATIA FAAOLATANE LIUGA:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi e Soloia ai le Tulafono o le Faalapotopotoga o Oloa Tau Faatoaga 2013 i lona faitauga faalua ma ou te fia tautala faamalamalama i ai.*

*Faaluaina e le Minisita mo Tina ma Tamaitai, Atinae o Nuu ma Afioga ma Agafesootai.*

**FOFOGA FETALAI:** Tulai mai lau Afioga i le Minisita o Tupe e saunua faamalamalama.

**Afioga Hon FAUMUINA TIATIA FAAOLATANE LIUGA:** Lau Afioga i le Fofoga Fetalai ma le mamalu o lenei Maota, o lenei Tulafono Tau Faaofi o le faaauauina lea o fuafuaga a le Malo e faamatuu atu ai nisi o faalapotopotoga e avea ma pisinisi tumaoti. O lenei la faamoemoe ma le Tulafono Tau Faaofi e pei ona faataatia mai, muamua, ina ia faataape le Faalapotopotoga o lo o i ai nei.

O lona lua, o le faaliliuina lea o aseta i le tulaga e tauave ai e i latou o le a manumalo i tauofoga pe a oo i le taimi e faataufofo ai. O le isi vaega o le tulaga ina ia aloaia ai le kamupani faale-tulafono o le a faatumaotiina i le tulaga pe a maea le faataufofina. O lenei foi Tulafono Tau Faaofi ua tuuina

mai ina ia soloia ai le Tulafono Tau Faaofi na faavae ai lenei Faalapotopotoga i le 1975.

Lau Afioga i le Fofoga Fetalai, e pei ona silafia e le mamalu o le Palemene o le aso ananafi sa toe tuu ai i tua le Tulafono Tau Faaofi lea, ona sa i ai teuteuga sa finagalo le Kapeneta e toe faamautu atili ina ia le gata o aseta a le Malo e le tatau ona faamautu faatasi ma le pisinisi, ae tuu i se tulaga e faamau totogi ai i latou o le a faagaoioia e pei o le fale o lo o i ai nei, po o fale o lo o i ai nei, faatasi ai foi ma fanua o le Malo.

O le isi vaega sa naunau ina ia malupuipua, muamua, ina ia mafai ona avanoa pea oloa tau faatoaga ia aua ne i monopolize ina e se kamupani o le a faamautu i ai lenei faleoloa ma le mafai ai e le aufaifaatoaga ona maua nei auaunaga i se tau talafeagai mo le faatinoina o a latou galuega, aemaise o le fofoga taumafa o le atunuu faatasi ai foi ma a tatou oloa auina atu i fafo.

O le isi vaega sa toe lauilu i ai le finagalo o le Kapeneta, ia mafai e le kamupani o le a faamautu atu i ai po o ai lava o le a manumalo i tauofoga ina ia aua ne i afaina se galuega a se tasi o lo o i totonu o lenei Faalapotopotoga pe a faamautu atu le Faalapotopotoga i pisinisi tumaoti.

E pei o le mafuaaga lena o lea e i ai le faataatiaga o lenei Tulafono Tau Faaofi, ina ia faataape le Faalapotopotoga ma faatulaga ai foi tulaga e pei o le faatulagaina o le kamupani o le a faatumaoti, ma puipua aseta a le Malo, puipua foi tamalii ma failauga ma alo o le atunuu o faigaluega ai ma le soloia o le Tulafono Tau Faaofi e pei ona faavae ai lenei Faalapotopotoga.

Ma lou faaloalo lava. Ia manuia le Fono.

**FOFOGA FETALAI:** Malo; faafetai i le faamalamalamaga a lau Afioga i le Minisita e ala i le faatulai mai o lenei Tulafono Tau Faaofi. O lo o avanoa le tatou Maota i ni sui usufono e fia saunoa. Ia malie foi lea Itu o le Maota o le a tuu muamua le avanoa i le Sui Taitai o le Itu Agai, le tama matua le sui usufono mo Falealupo ona faasolo atu ai lea i la outou faalava.

Tulai mai le sui usufono mamalu.

**Afioga Hon AEAU PENIAMINA LEAVAISEETA (Falealupo):** Faafetai lava mo le avanoa lau Afioga i le Fofoga Fetalai. Ou te tulai atu ma le faaloalo e tatau ai i le mamalu o le Palemene ma o lea o le a tau atu le mafuaaga e leo laitiiti ai le Itu lenei ona e faasa e lau Afioga i le Fofoga Fetalai. O le mafuaaga, sa tatalo le Itu lenei a o faagasolo le Tulafono lea talu ai nei, leaga e i ai Tulafono e tau utia laitiiti ai i tatou, e i ai foi Tulafono matou te tapuaia lelei. O le mea lea sa matou le – a o lea la o le a matou taumafai atu i le Tulafono Tau Faaofi lea ua aumai nei i le Afioga i le Minisita mo Faatoaga, faafetai lava mo lea fuafuaga.

O le faafetai, ona ua tuu ese. Ua mafua lea lagona ona ua vaaia e le atunuu ua faatau moega ma mea e le tatau, ae e leai ni mea faapena i ni faatoaga. Atonu o le mea lena na gau ai ona ua sese le Pulega, ua sese le mea ua ave i ai le faamuamua. O le ofisa mo mea tau faatoaga, e le tau fai atua aua ua iloa, a o le matou lena vaai, se o tatou uma lava it's a matter of fact. Sa tele faitioga po o fautuaga, na ave faafautuaga i le mamalu o le atunuu, na logona ai le Pulega i lenei vaitaimi atoa ai ma kamupani. Aisea? O lea o le a faoa e se Malo le galuega a le private sector, ae fai lava. Ua a nei? Ia, lelei. Atonu o le mafuaaga lena ua gau ai. E taua le agaga ia te au as a faifaatoaga.....

**FOFOGA FETALAI:** Malie le sui usufono o lo o saunoa e i ai le mea e fia faasao.

Tulai mai lau Afioga i le Minisita o Tupe e a ia le Tulafono Tau Faaofi.

**Afioga Hon Faumuina Tiatia Faaolatane Liuga:** Lau Afioga i le Fofoga Fetalai ou te iloa e matuia le tuuaiga e gau le kamupani. A silasila le sui usufono mamalu o lo o saunoa nei i tausaga e lua ua mavae atu, e le o gau o lae ua amata ona lelei. O le vaega foi lena ua amata ai ona faa-privatise, a o la e ua amata ona agai i luga ana tupe maua. E le o gau la le kamupani a o la e sikuea.

O le isi foi mea i oloa ia e taua e le sui usufono faapea na aumai ai ni oloa e le o ni oloa tau faatoaga, e le nofo le faifaatoaga i lalo o se fa'i. Na ala ona aumai laupapa ma apa ma mea faapena, ia mautinoa e maua foi e le faifaatoaga le benefit i lalo o concessions o lo o agavaa i ai oloa tau faatoaga. O oloa o faatoaga e aofia ai laupapa aua o le folesi o mea tau faatoaga. A faapea lava la o la e maua se mea e lalafi ai le....

O aso la sa ou vaai o la e nonofo i lalo i laufai, ae talu ai o lea ua advance le lalolagi, o lea la ua tatau ai ona fai fale. O laupapa, fao e aumai. E taumafai ia tasi lava le vaega e saili i ai oloa a le faifaatoaga ona maua lea.

**Susuga Hon Tuilaepa Fatialofa Lupesoliai Aiono Neioti Sailele Malielegaoi (Palemia):** O se mea e fia faasao lau Afioga i le Fofoga Fetalai.

**FOFOGA FETALAI:** Ia malie la lau Afioga i le Minisita e a ia le Tulafono Tau Faaofi, se i tulai mai le Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** O la e sau tonu lava le sui usufono mo Falealupo i le mea sa ia iloa i aso la, ae ua ova nei i le 40 tausaga e le i toe oo i tua i Falealupo. Na te le o iloa aua o la ua nonofo faifaatoaga i Falealupo i fale laupapa, fale sima ma fale apa. O le ala lena e tau fai ma faaletonu ai le vai lea. O lea la e fautuaina ai ina ia alu i Savaii e fautua i lona itumalo se i tau soso ese mamao ma le mea lea e pue ai le suavai.

E pei la o lau fautuaga lena, a o la e sao lelei lava le sui usufono. O la e saunoa i le mea sa i ai i aso la, ona ua leva ona le toe oo i Savaii.

**FOFOGA FETALAI:** Ia, tulai maia le sui usufono mamalu o lea ua manino ma malamalama ou atugaluga e ala i tulaga na e taua ai moega ma laulau ma tables ma mea uma na.

Tulai mai le sui usufono mamalu.

**Afioga Hon AEAU PENIAMINA LEAVASEETA:** Faafetai i lau Afioga i le Fofoga Fetalai. Ona aumai loa lea o mea nei, in modern times la, o faamalu ma moega ona moe loa lea ma le faifaatoaga. E le o ni mea na e ave i le aufaifaatoaga.

O mea nei e manao ai le faifaatoaga ia faataugofie le fertilizer pe tufa fua e le Malo. O mea taua na aua e leai se isi o oulua e i ai se maumaga. Silasila la i ai, ia faataua mea na aua o la e faafofoga mai le aufaifaatoaga. With all due respect, o lau tala lea e fai atu ia oulua. O le a le mea e manao i ai le faifaatoaga? E le manao i se moega, e le manao i mea ia tou te faia, ae manao

i le tau o vailaau, o fertilizer ia maualalo, ae le manao i ni moega ma ni faamalu.

**FOFOGA FETALAI:** Malie le sui usufono mamalu se i avatu le folasaga a le Minisita e a ia le Tulafono Tau Faaofi.

Tulai mai le Minisita.

**Afioga Hon Faumuina Tiatia Faaolatane Liuga:** Ou te faafetai i le sui usufono mamalu mo Falealupo. Ou te le i taua ni faamalu, sa ou taua laupapa, apa ma fao. Ou te iloa o le mea lena aua o lea sa ou vaai i le maota o le Afioga i le sui usufono, o la e i ai mea na i totonu, ae ua vave ona alu ai i lalo le.... E le o iloa e si ona itumalo e le atoa le lima tausaga o le vai la e i ai nei ona ua toe laga foi i luga paipa aua leaga o le mea na tupu muamua e toe tupu foi. Na laga paipa ma tufa i le nuu ae aumai isi paipa i Apia nei. O le mea la e i ai, e toe laga foi paipa la ona o lo o faaoga pea e le sui usufono mamalu le eleele o lo o tapue ai le suavai ma e mimiti uma lava e Neiafu, ae malaia ai Falealupo aua o lea e nofo i lalo le tane ma le borehole a Falealupo, ae leai ni moega na ou taua lau Afioga i le Fofoga Fetalai; ma so o se tagata soifua lava, e tataua ona moe.

**FOFOGA FETALAI:** Ia, tulai mai le sui usufono mamalu mo Falealupo e faaauau le saunoaga.

**Afioga Hon AEAU PENIAMINA LEAVASEETA:** Lau Afioga i le Fofoga Fetalai, a e lailoa lava. A lailoa lava le Afioga i le Minisita.

O le Minisita lea e pei o lea o le a taumulimuli i style a le Palemia i le toso ese o se mea. Ia, o lea ua tatou oo i le suavai, a o lea e lauga atu au i le faamalu. E ui i lea, ia taatia la lea mea.

Na tatou silasila talu ai nei aua o upu tuusao ma upu tautino lea e tau atu, ia manatua e talu ai nei sa fai ai le Ad a le Agro Store, o lea o le a alu atu le taavale e faasopolia uma ai faifaatoaga aemaise lava matou iinei i Upolu. Ua outou silafia le Ad lea? E faaluasefulu i le po, in imagine the old days, faapea talofa e. E oo lava i nei tamaiti o lo o tau fesilisili mai i Ad i le televise. O le a se mea e maua mai i le Ad lea? E tasi lava le faasalalauga ona iloa uma lea e tagata. By the way, who ask them e alu atu le taavale taamilo ae leai se isi e faatauina se mea, ae faaluasefulu ona sau i le po i le fitu aso i le lua masina. How come? Isn't that's your common sense? O le a lea mea e alu faapea ae leai se mea o maua ai? E leitioa gau - ia o lea o le a faatau.

**FOFOGA FETALAI:** Malie le sui usufono o lo o saunoa se i avatu le faamalamalamaga a le Afioga i le Minisita.

**Afioga Hon Faumuina Tiatia Faaolatane Liuga:** Lau Afioga i le Fofoga Fetalai, o la e sese le mea la e saunoa i ai le sui usufono mamalu. E le mafai e se pisinisi o saili se tupe ona faafeoai fua taavale. O le mea foi lena sa aveese ai trials mo eleele sa i lalo o le Faleoloa o Faatoaga, ona e le o se Matagaluega, a o le Faalapotopotoga Tumaoti a le Malo e tataua ona saili ni ana tupe.

I le 2001, o la e puipuia ai tulaga faapea i mea e leai se value added e o i ai ma faaoga i ai aseta, ae e pei o le tulaga lena o lea ua puipuia mai ma ua



soloia ai le Faalapotopotoga lea, faataape ina ia faamaioio lelei ma tuu atu ia i latou o lo o i ai le silafia faipisinisi e faatino ai galuega e manuia atili ai le Faalapotopotoga.

Ma lou faaaloalo lava.

**Afioga Hon AEAU PENIAMINA LEAVAISEETA:** Faafetai; ia lau Afioga i le Fofoga Fetalai, masalo o le a – ua alofa atu, ae taua nai tuualalo faapea e amanaia ai nai tamai mea laiti faapea aua o a tatou seleni o lo o lelea i le ea e aunoa ma se penefiti e maua ai. Aua a faaputupu tamaia mea faapea ona tatou le gau lea ae maua sina penefiti, ae aoga nai tuualalo ia i isi Matagaluega e fia a le Malo o lo o aafia i mea faapea.

Ona oo mai loa lea o se matou faamatalaga - faafetai lava mo lea fuafuaga. O le talosaga e faapea; o le talosaga a le aufaifaatoaga ia aua ne i aveesea se Ofisa faapea leaga e maua ai le fesoasoani a le aufaifaatoaga aua e le maua mai i se private company se pau. E faapea ai se taofi, faamolemole o le au matitiva, o le aufaifaatoaga e matitiva, they are struggling. Ok - o fesoasoani ia mai fafo faamolemole, ave i ai e faataugofie mai ai. Vaai e le tele lava ni mea matou te talosaga atu ai, na o fertilizer, o nai fagavao foi pe a maua, o mea uma e fesoasoani ai i le aufaifaatoaga, faataugofie le aumai mai fafo, ona aumai loa lea tuu i faleoloa aua e le mafai e se kamupani ona ave i ai se subsidy aua e mafai lava ona mark up e le private company. Na o le pau lava le mea e taunuu ai moomooga nei, o le faleoloa o le Malo, ae taumafai e aveese mea o expenses ia.

O le fautuaga lena. Ia manuia le Fono.

**FOFOGA FETALAI:** Malo - ia tulai maia le sui usufono mo Aana Alofi Nu.3.

**Afioga TOEOLESULUSULU CEDRIC POSE SALESA SCHUSTER (Aana Alofi Nu.3):** Faafetai i lau Afioga i le Fofoga Fetalai mo le avanoa. Faafetai mo le Tulafono Tau Faaofi. E tasi lava se vaega lea e fia maua i ai sina malamalamaaga lau Afioga i le Fofoga Fetalai, na o le Fuaiupu 5 e pei ona saunoa le Afioga i le Minisita. O le faanaunautaiga ia aua ne i pulea toatasi e se kamupani. Peitai ane, o le faaupuga o lo o i ai, o se tagata. E i ai la le atugaluga, pe tatau ma talafeagai le tuu i ai ma le upu lea o le kamupani pei ona silafia a faateleina e tagata, o lona uiga o se kamupani o latou o le a manumalo, e le mafai ona afaina ai i le vaega lea. Pe talafeagai ina ia tuu i ai i totonu, e le gata i se tagata e toatasi, a o se kamupani foi e faapea ona latou tauofo ma mauaina lea avanoa. Faafetai.

**FOFOGA FETALAI:** Malo faafetai. Tulai mai le sui usufono mamalu mo Faleata Sisifo.

**Tofa LEALAILEPULE RIMONI AIAFI (Faleata Sisifo):** Faafetai i lau Afioga i le Fofoga Fetalai mo le avanoa. E faatalofa atu foi i le paia ma le mamalu o le usugafono a Samoa i lenei aso.

O se manatu puupuu i le Tulafono Tau Faaofi. E muamua ona avatu le faafetai tele i lau Afioga i le Minisita ma le Matagaluega e tusa ai o lenei Tulafono Tau Faaofi. Ou te talitonu ua leva ona foufou mai lenei faamoemoe, ma o lea ua faataunuuna i lenei taimi e lau Afioga i le Minisita. Ia manatua

foi le faataapeina o le Matagaluega o Galuega, o lea ua tele kamupani ma pisinisi fou ua tulai mai ma ua sii ai foi i luga le tulaga o le faatinoina o galuega ma auunaga.

O lea la ua faasolo mai i le Matagaluega o Faatoaga. A o le agaga lea o le Malo, afai ua lava tapena le private sector e absorb ina auunaga ia, ona tuu loa lea i ai ina ia faigofie ma lelei le faatinoina faapisinisi faatauva o nei vaega uma, ae i ai nai vaega ia.

Muamua, o lou lava sui usufono ou te le o fiafia i le upu lea o le faataapeina lea e aumai i le Tulafono Tau Faaofi. O lea foi ua saunoa le Afioga i le Minisita o le a faataape. A faataape, e pei o se mea foi lele o le a faapa se pomu taape e pei o se mea ua le toe fiafia i ai, a o le mea sa e faia. Pe le mafai ona tuu i ai le upu foi lea o le faamatuu atu aua o lea e pei e faasolosolo faapea.

O le isi vaega faafetai e le o taofi e le Malo fanua. A o le fesili, aua ou te talitonu pe le o i ai ni aitalafu ma ni nonogatupe a le kamupani pe faapefea la ona faaauau galuega a le kamupani fou lea o le a faatulai mai?

O le isi vaega o lo o faataua mai i le fesuiaiga lenei, o le mautinoa lea e le Malo o lo o puipuia nai o tatou tagata o lo o faigaluega ai. Ia, e tatau ou te le o iloa, ae ou te talitonu e tatau ona ave se avanoa ia i latou nei, ave i ai se mea foi lea po o se option faapea o i latou lava ia ua fia malolo, ia maua ni o latou totogi e faamatuu i ai. I latou ia pe afai ua fia redundant, ave i ai faamanuiaga pe a le fia faaauauina le tautua i le vaega fou lea. Aua o le isi mea e moni o lea e puipuia iinei e faaauau ona faigaluega i le vaega lea, a o lea foi o le a i ai le malosiaga i le kamupani fou e faatea ai ma faamalolo ona o lea o le a ese le tulaga lea o le a i ai ona o lea o le a faagaioi faapisinisi. Aua o le mea lea e i ai i le taimi nei, pe taulia se vailaau pe le taulia, e maua lava lou totogi i le aso totogi o le Malo. A o le mea lea o le a i ai nei, o le mea foi lena e tatau ona tapena i ai tagata faigaluega nei. E i ai foi le vaivaiga lea sa i ai i le faataapega muamua o nisi o kamupani lea sa talitonu e pei sa fai faa-shareholder tagata faigaluega. A tau tuli atu la e le Pule ae faalala mai le shareholder a le tagata faigaluega. Ua atili ai lava la ona le lelei, e oo mai i le aso nei o lo o tau faaolaola isi ia e faapea ona fai.

O se faiga lelei tele aua o lea ua tatou talitonu ma vaavaai i ai, o lea ua i ai foi nisi o le aufaipisinisi o le atunuu o lo o faia lea auunaga, ma o lo o lelei lava le faatinoina, aua a o ta alu atu i le faleoloa lea o Faatoaga e le maua ai, ona toe sau lea i le isi pisinisi lea e faia. O le mea la e malie ai, a ta toe sau i le pisinisi lea e faia, na o le toalua lava na o le faatauoloa ma si tamaitiiti la e fealuai i tua, ae toetiiti lava tutusa le tetele ma le tele o mea o lo o maua ai. E pei o ituaiga mea na e ao ona tilotilo i ai mo le agai i luma.

O le isi vaega e fautuaina foi le Malo i nisi o Matagaluega ua tatau foi ona oo i ai lea fuafuaga i le agai i luma, e pei o le Polenisia. Atonu afai o fuafua i ai, ua tatou vaavaai nei i ai, o lea lava e i ai nisi tamalii ma failauga o lo o fai a latou tamai kamupani vaalele faapea e o i Tutuila ma omai, o la e tauva ma ola lelei, ae ou te talitonu ua lava foi le taimi ua maua le malosi ua tatau ai foi ona faame'i latou i tua e tauva ma ola faapisinisi ai e pei foi o isi kamupani tumaoti.

Ma le faaaloalo lava.Faafetai.

**FOFOGA FETALAI:** Malo faafetai saunoa. Malie le sui usufono o tau tulai mai se i avatu muamua le avanoa i le Palemia.

**LAUGA FAAMALAMALAMA A LE PALEMIA I LE PALEMENE  
ASO LULU, 7 AOKUSO 2013 I LE FAITAUGA FAALUA O LE  
TULAFONO TAU FAAOFI O LE SOLOIA O LE TULAFONO O LE  
FAALAPOTOPOTOGA O OLOA TAU FAATOAGA 2013**

**Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI:** Lau Afioga i le Fofoga Fetalai, o lea ua saunoa le sui usufono mo Faleata Sisifo e faatu mai nisi o mea e tatau ona faamatuu atu i tua.

Masalo e taua le silafia e le Maota o le manatu ua faaalua e faatino i le Tulafono Tau Faaofi i le taeao lenei, o le polokalame faaauau lava lea a le Malo e faamatuu atu ai i tua e faagaioi faapisinisi kamupani nei ona o le talitonuga foi lea e faaseese ese le Malo ma faiga pisinisi, ae tuu atu i tua e maua ai le avanoa e le aufaipisinisi latou te faagaioia.

Pe a toe tomanatu i letaimi na amata mai ai i le 1989 i le muamua faamatuu atu i tua le faletalimalo o le Tusitala. E tele lava foi le vevesi sa i ai i le Palemene lenei ona o tulaga lava foi e le i maua atoatoa le taunuuga o fuafuaga faavae a le Malo.

E i ai le fonotaga sa ou faamatalaina ai i totonu o le Maota lenei e tau faamalalalama ai i le Itu Agai i na ona po ona e leai lava se mea e eseese ai le fuafuaga lea a le Malo ma le mea foi lea se i tulou, o lou alu e aumai se manu papalagi e faafagafao. Ona faapeti lea ma ua lapoa ma saga lapoa ae lava, a o le taimi lava e peti ai ua faatau loa. O le taimi sili lena ona tele le tupe e maua mai ai nai lo le alu, alu, alu te i ua e vaai atu ua lavea i se faamai leaga ona e vaai atu loa lea ua toe o ivi, toe faatau atu ua le aoga. Sa tele ai lava le vevesi i na foi onapo ma faapea ai nisi, “Se ua maumau aseta a le Malo?

O nisi la nei o faalapotopotoga po o aseta nei o meatotino a le Malo faapisinisi na tuuina atu i tua. O le Vailima, o le faletalimalo o le Tusitala ma le Faletupe o Samoa i Sisifo po o le Bank of Western Samoa. Na faamatuu atu i tua le bank lenei a o tele lava ana tupe maua.

O le tali a le Malo i le taimi lena, e sili atu ona tele tupe o le a maua na i lo tupe na maua i le taimi lena. O lea la ua e vaavaai i ai i le vave ona lapoa, ua vave ona tele lala ua tatala solo i totonu o le tatou atunuu.

Na faamatuu atu foi i tua le tatou televise, faamatuu atu i tua le SamoaTel, faamatuu atu i tua le Polenisia. E le o le Polenisia laitiiti lele e feleleai i inei, a o le Polenisia lapoa lea sa i ai vaalele foi nei o Jet sa feleleai i o i Amerika. E lua 737 ma le 767 e tasi sa lele sao atu i inei alu i Amerika. Ia, faamatuu atu i tua le tatou Coconut Mill, faamatuu i tua le PWD po o le Public Works. O lea ua galulue faapisinisi i le faiga o auala. O lea la ua faamatuu atu i tua ma o lea ua toe peti mai ma ua avanoa ai galuega a le Malo e peti mai i ai i latou e fai konekarate faapea foi ma i latou sa i totonu o le Malo, ua o atu fai a latou pisinisi i tua.

O lea la faatoa iloa i le taimi lenei le faamanuiaina o fuafuaga mamao a le Malo, ae sa tele ai lava le fevesiai i lena taimi na amata mai ai. O le tulaga faigata i le maitau a le Malo i le vaavaai atu i le faamatuu i tua o mea nei ona o le lava o le avanoa e fai ai ni sea o tagata lautele. O i ina la lea na faatu ai le UTOS ina ia mafai ai ona o tagata i le UTOS e ave i ai a latou tupe, ona omai loa lea o le UTOS faatau sea i mea uma nei ina ia mafai ona faapea ane, leai e le o umia uma e i latou mai fafo po o i latou lapopoa, a o lea e fai sea

uma i ai le lautele o le atunuu. O lēna na faatonuina ai le Matagaluega o Tupe ina ia faatino le UTOS. E le i mafai lava ona faamatuu atu i tua le SamoaTel se i vagana ua faatu mai le UTOS ona o le talitonuga o le Malo, this is a money making operation venture lea o le communication, ma e le tatau ona selau pasene ona umia e se faalapotopotoga lea o le a manumalo i le tender.

O le ala lēna na mafua ai ona muamua faatu le UTOS, o lea la ua maua ai le avanoa e mafai ai ona fealuai le toeaina ma ave lana \$50 i totonu o le UTOS e faatau ai lana share ma faapea ane, o au e ana le kamupani lea, o au e ana le mea lea, o au e ana le mea lea. E le o toe faapea o lo o umia uma e vaega foi ia mauoloa. O le vaivaiga atoa lava lēna o lea sa faafeagai ma atunuu o le lalolagi i le mea lea o le privatisation, o le uma ane ua ave e le au lapopoa ae leai se avanoa mo le lautele e mafai ai ona sao i totonu o ituaiga aseta nei ua faamatuu atu i tua.

Lau Afioga i le Fofoga Fetalai, o le isi lea faaopoopoga o faiga faavae a le Malo e tuutuu malie atu ai i tua gaoioiga faapisinisi o lo o faatino ona o le talitonuga maumauai, e tele le manuia o le atunuu e maua mai pe a oo ina faamatuu atu i tua, na i lo le tauave pea e le Malo, ona e i ai lava le agaga foi lele lea foi e lavea ai le Esetete Tausi i le aufaigaluega, "Ia, o mea faitele."

O le tulaga foi lēna na ala ai ona faamatuu ese le tele o eleele o le Esetete Tausi ma faamatuu atu loa i tua ae amata ona galueaiina e le toatele o le atunuu.

Lau Afioga i le Fofoga Fetalai, ua ou manatu e faaopoopo atu le vaega lēna ona o le Tulafono Tau Faaofi i le taeao lenei, o le faatinoga lea o faiga faavae a le Malo lea o lo o faagasolo pea.

### **TULAFONO TAU FAAOFI E SOLOIA AI LE TULAFONO O LE FAALAPOTOPOTOGA O OLOA TAU FAATOAGA 2013 – faitauga faalua**

**FOFOGA FETALAI:** Malo faafetai i le faamalamalamaga manino a lau Afioga i le Palemia.

Ia, se i tulai mai le sui usufono mamalu mo Falealupo.

**Afioga Hon Aeau Peniamina Leavaiseeta:** Lau Afioga i le Fofoga Fetalai, ona o lea ua saunoa tonu lava le Afioga i le Palemia i le autu o lou tulai atu i le itu lea. O lea ua tali mai se i faamalamalama atu faamolemole.

Lau Afioga i le Palemia, faafetai mo le faamalamalamaga. O le taua ia o le agaga lea ua saunoa i ai le Afioga i le Palemia i faiga faavae a le vaega a le Malo i le faamatuu atu, lelei. Ona pau lava lea o le mea lea e talosaga atu ai ona e i ai mafuaaga lea ua uma ona tau atu ma e toe faamalamalama atu, aua ou te iloa e le mafai foi ona le talitonuina. O le toatele lea o le atunuu aua ne i faagaloina e le Malo, o le aufaifaatoaga, e matitiva, e lima vaivai, e faigata le galuega, ae leai foi ni a latou aseta e ola ai. E le mafai la i le talitonuga o le sui usufono lenei i so o se kamupani lava i le taulaga ona fai ni a latou totogi o mea nei..... O le malos i le Agro Store, e le mafai.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai.....

**FOFOGA FETALAI:** O lea ua maua le saunoaga a le sui usufono mamalu.

Tulai mai le Afioga i le Palemia e faamalamalama le mataupu lea.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Na o le pau lava lea o le mea ou te tulai atu ai e fia faasao le sui usufono. O le taimi na ou i ai i totonu iinei i le Pulega o le Treasury, sa faatonu ai le study sa conduct e se alii pisikoa e igoa ia Mike Munch\_e alu e faatino se study ina ia fai se faleoloa faapitoa mo mea nei o fesoasoani mo le aufaifaatoaga. O le maea ai o le study lea, sa fonu ai i matou o le Pulega o le Treasury ma ave ai le fautuaga i le Minisita o Tupe i le taimi lena faapea foi ma le Minisita o Faatoaga. O le Minisita o Faatoaga sa i ai i le taimi lea, o le Afioga ia Muagututia Pinati. O matou la nei sa i ai i le lio o le faatuina o le faleoloa lenei, ua 38 tausaga talu ai. O lea la i le taimi lena, toetiiti lava leai se faleoloa na faaulufale maia ni oloa tau faatoaga. O le ala lea na mafua ai ona fai le study lea e Mike Munch ma iloa ai e laitiiti lava nai mea e aumai e faleoloa i lena taimi ona o le leaga tele o tupe na maua mai i oloa tau faatoaga. O lea la na ave ai le Tulafono Tau Faaofi i le Palemene ma pasia ai ma faatu ai le faleoloa lenei.

Lau Afioga i le Fofoga Fetalai, o le itu lea e saunoa i ai le sui usufono i le aufaifaatoaga, a tatou talanoa i le aufaifaatoaga e pei foliga mai e ese le aufaifaatoaga la e i tua, ese tatou nei e le o malamalama. O au foi o le faifaatoaga, o tatou uma lava nei o lea tatou te talanoa i mea tatou te iloa. Sa tatou ola uma lava ma atiae o tatou olaga i faatoaga. O lea la tatou te iloa, ou te iloa lelei lava mea e moomia e faifaatoaga a le matou nuu. O le upu foi i aseta, a lea sa e tetee, tetee i taavale afi, i le aumai o taavale afi i le itu taumatau, a o le a la le mea lea ua tupu? O le matua tele o faifaatoaga ua fai a latou aseta, ua fai a latou taavale afi.

Lau Afioga i le Fofoga Fetalai, e ala ona ou tulai atu e faamanatu atu i le sui usufono ona o tatou uma lava o faifaatoaga. E toaititi lava i latou ia e iinei e leai ni faatoaga, a o tatou uma lava o faifaatoaga. Ina ne i te i ua manatu le sui usufono e le o malamalama le itu lenei i mea e moomia, ae na ona ou faamanatu atu.

**FOFOGA FETALAI:** E manatu o lea ua manino ma malamalama atugaluga o le sui usufono mo Falealupo. E i ai se isi mea fou?

**Afioga Hon AEAU PENIAMINA LEAVASEETA:** Ou te le o malamalama. Ua atili nunumi ai le mataupu. Silasila foi le Palemia, o le taimi lea e saunoa ai ua 38 tausaga talu ai ua absolute. O lea e talanoa lava i i na o theory, theory, a o lea ou te talanoa atu i le practical. Silasila lelei ma vaai i mea e aoga...e faatau ai se fetilaisa i na mea?

**FOFOGA FETALAI:** Malie le sui usufono se i tuu atu le avanoa i le faamalamalama a le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** O le tagata e le malamalama i mea e mafua ai ona fai mea ma mea e mafua ai ona tuu, o i ina e aliali mai ai e matua le malamalama lava i se mea. O lea e malamalama uma lava vaega ia e omai i lau faamatalaga lea e

avatu. O le mea aupito sili ona faatauaina i Afioga a le Atua, o le tagata na te iloa le mea e tatau ona fai ae na te le fia faia o le matua agasala. Le sui usufono mo Falealupo, o oe o le tiakono ae ou te vaai atu e te le malamalama i Afioga ia. O le tagata e iloa le mea e tatau ona fai ae matua musu e malamalama ai, o le mea tonu lena ma o lou ata atoa lena. Talu lava ona e tulai mai i le Nofoa lena, e te saunoa loa see ese mea e te saunoa i ai a o lo o soifua Samoa.

**Afioga Hon AEAU PENIAMINA LEAVAISEETA:** Faafetai lava, ia ua lelei faafetai a lailoa lau Afioga, ia alaala loa i lalo se i fai atu le mea lea.

Lau Afioga i le Fofoga Fetalai, faafetai lava a lailoa lau uo. O lea o le a faauma atu loa.

**FOFOGA FETALAI:** Malie le sui usufono mo Falealupo se i alaala mai i lalo faamolemole.

O le faasaosaoina o le Fono ma le tuuina atu o avanoa, ia outou malilie o le pule lena a le Fofoga Fetalai, ae e le o le tu ae lava i luga o le isi sui usufono faatonu le isi sui usufono e alaala i lalo, a o lea e faasolo lauga. O lea lava e avatu avanoa ona o le ava atu.

Tulai mai le sui usufono mamalu e faaii mai le saunoaga.

**Afioga Hon AEAU PENIAMINA LEAVAISEETA:** Faafetai lava i lau Afioga i le Fofoga Fetalai. E leai, o le naunau lava ma le isi mea o lo maua lava va faa-Saint Joe lea e tau fai i inei. E tasi la lea policy, tulou lava le gagana, o le fagafao e faatupu ia peti. O le policy masani lea a le HRPP, a lapoa loa faatau atu. O le mea la lea e tupu i i ua TB le atinae lea ae e le i lapoa, e le i oo i le taimi e faatau ai. O lea la o le ua minia atu, ae oti le aufaifaatoaga.

O lau tala lenei ae ou te le i nofo i lalo, e le mafai e se kamupani ona tuu mai i lalo se tau o se vailaau e i lalo ifo o le tau e le maua ai sana polofiti, ae mafai la e le Agriculture Store mai luga o le fesoasoani mai fafo pe a ave i ai. O le challenge lena....subsidise.

**Susuga Hon Tuilaepa Fatialofa Lupesoliai Aiono Neioti Sailele Malielegaoui:** Lau Afioga i le Fofoga Fetalai o le mea e fia faasao.

**FOFOGA FETALAI:** O lea ua maua le finagalo o le sui usufono, ae malie se i tuu atu le avanoa i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoui:** Lau Afioga i le Fofoga Fetalai, o lea ua maua le finagalo o le sui usufono mo Falealupo e mafai e le Agriculture Store ona aumai vailaau, ona faatau lea i le tau e i lalo ifo o le cost price ina ia atili ai lava ona gau. Se i vaai la i ai, e le faapena se Saint Joe. Lau Afioga i le Fofoga Fetalai, e i ai le...se i uma atu lava lau tala lea leaga e taua.

O le atunuu lea o Niue, o le Samoa na muamua oo i ai e momoli i ai le talaiga o le Talalelei, a o le Samoa lea faatoa iu mai i Malua. Ona o loa lea ma le Niue sa tafaovale i inei ona o le isi foi afa Niue. Ona o atu loa lea ua lalata atu le vaa, sa o i le vaaalo. Ona fai atu loa lea o le Niue, "Ua e iloa, ua ou faamaia lava ae muamua atu i gauta." A e tau atu loa i le nuu, uma la

outou feiloaiga ona tau lea i ai o lou igoa ma fai i ai ua ou le oo atu ona ua ou mai, a o lea o le a ou faatali atu iinei i le ana. O le ana lea sa ou alu i Niue ou matamata ai.

O le faifeau lea e tu lava lona maa faamanatu i totonu o le taulaga ona e pei lava o Ioane Viliamu. Ona alu loa lea o le faifeau, na ona taunuu atu lava o le faifeau alu i totonu o le Maota, tilotilo mai loa taulelea o le nuu laga mai loa fasi faamo'amo'a le faifeau, toetiiti lava oti, na o sina tamai ola lava na totoe. Ona faapea ane loa lea o le faifeau, "E i ai le alii Niue la e i gatai," a o le taimi lena ua laga mai toeiina ma loomatutua faafeasogi ae ua masofasofa uma le faifeau i le taligamalo faa-Niue.

O le mea lena e fai e Niue, e muamua fusu e faaali ai le agaga fiafia ma le fealofani. O le mea lea le sui usufono mo Falealupo, aua e te te i. A ta fetau lava taua faa-Saint Joe, o fetauiga faa-Niue. Ia manuia le Fono.

**Tofa Lefau Harry Schuster (Vaimauga Sisifo):** Faamolemole lau Afioga i le Fofoga Fetalai o se mea e fia faasao a o le i faaauuina le finauga faa-Saint Joseph lea.

**FOFOGA FETALAI:** Tulai mai se tasi o sui usufono mo Vaimauga Sisifo, Tofa Lefau Harry Shcuster leaga o lea e maua le finagalo o le sui usufono mamalu, a o oe foi lea ou te maua atu e fai lou pito Niue.

**Tofa Lefau Harry Schuster:** E pito Niue toe pito Saint Joe, ae na o se mea e fia faasao i le saunoaga a le Afioga i le Palemia.

O matou Niue e le i omai e tafafaovale ae na omai i faatoaga a Siamani, a o isi na omai e o i Malua, a o isi foi na faafeiloai faa-Niue. O la e sao lelei lava le saunoaga a le Palemia aua o la e silafia e le Afioga i le Minisita mo Tina ma Tamaitai, Atinae o Nu'u ma Afioga ma Agafesootai leaga o la e faiava i le isi ou tei.

**FOFOGA FETALAI:** Masalo o se Niue tafaovale lea na o ma le faifeau.

**Tofa Hon Tolofuaivalelei Falemoe Leiataua (Minisita mo Tina ma Tamaitai, Atinae o Nu'u ma Afioga ma Agafesootai):** Lau Afioga i le Fofoga Fetalai.....

**FOFOGA FETALAI:** Tulai maia pe afai o e maupaolo i Niue.

**Tofa Hon Tolofuaivalelei Falemoe Leiataua:** Na ona Niue lava a o tausala o le atunuu. Ua iloa foi e i tatou, na omai Niue i aso la ua fia selau tausaga, a o lea ua omai nonofo i le taulaga. O lona uiga o tagata popoto uma lava ia na omai, a o la ua tutuli Hamo o i uta. O le mea lena e sao lelei ai lava le saunoaga a le Afioga i le Palemia. Ta te fia faalogologo lava i a la fetogiaiga ma le Sui Taitai o le Itu Agai aua e paleni a la upu, ae tu mai loa le Taitai o le Itu Agai, na o le oti ai o le mea.

O lena e manaia le fesuaaiga a toeiina matutua, ma lou faaaloalo lava.

**FOFOGA FETALAI:** Malie ia lau Afioga i le sui usufono mo Falealupo o lea ua vaai atu o le a toso le lua misa ae umia ai ma le tatou taimi. Ae manatu

le sui usufono mo Falealupo ua manino lou finagalo ae tulai maia e faatea sia fuilauvi.

**Afioga Hon Palusalue Faapo II (Taitai o le Itu Agai):** Lau Afioga i le Fofoga Fetalai.....

**FOFOGA FETALAI:** Le Taitai o le Itu Agai.....

**Afioga Hon Palusalue Faapo II:** Na o sina mea lava e fia faamalamalama.

**FOFOGA FETALAI:** O le a le mea lea e tau faamalamalama?

**Afioga Hon Palusalue Faapo II:** I le faiga faavae lea a le Malo e.....

**FOFOGA FETALAI:** Aua ne i oo lau saunoa i le Taitai.....

**Afioga Hon Palusalue Faapo II:** Leai, ou te le amanaia le pola motu i tua. E le maimauina lou taimi ou te tali ai i ai.

**FOFOGA FETALAI:** O lea ua maea mai le saunoaga a le sui usufono mo Falealupo.

Tulai mai le sui usufono mo Falealupo e faaauau le saunoaga.

**Afioga Hon AEAU PENIAMINA LEAVASEETA:** Lau Afioga i le Fofoga Fetalai, faafetai lava mo le avanoa mulimuli. Ou te faamalulu atu foi i le pau o le Palemene i se lagona, ae leaga o le lagona e taua ma le molimoli atu o le matou pitolaau.

Lau Afioga i le Palemia o tulaga lava e faapena, ae na o le pau lava le mea ia oo atu se lagona aua ou te talitonu o lagona lava foi na o le aufaifaatoaga uma lava. Se i o tatou tulimatai la le suiga lea pe mata e maua ai se faamama-avega mo le aufaifaatoaga i tau o a latou oloa e fesoasoani i a latou galuega. Ona pau lava lea o le agaga o le sui usufono mo Falealupo, faafetai.

**FOFOGA FETALAI:** Faafetai timai, faafetai saunoa.

Tulai mai se tasi o sui usufono mo Salega, Afualo Wood Uti Salele.

**Afioga AFUALO WOOD UTI SALELE (Salega):** Faafetai i lau Afioga i le Fofoga Fetalai, faamalo atu foi i le sui usufono lea faatoa maea atu nei le lafolafa. O aga lava ia faa-Palemene e sua i luga, sua i tai ae saili se ai mo le tatou atunuu aemaise lenei Tulafono Tau Faaofi taua.

Ou te faamalo atu i le Afioga i le Minisita o Tupe ona o le taua o lenei Tulafono Tau Faaofi, o lo o agiga manino ai i i le agaga o le Malo lea ua faataoto mai i ana mau faavae la e i ai e faipaaga ma faalapotopotoga ma pisinisi tumaoti. E pei o le isi lenei o pine faamau lea e tausii mavae i ai le tatou Malo. E faamalo atu i le tulaga lea.

O le tulaga lava ia i le faamatuu atu o le Faleoloa o Faatoaga ina ia faatinoina i lalo o se pisinisi o se tulaga lelei ona e tele ni vaega e afua mai ai e pei ona saunoa le Afioga i le Palemia atonu lea ua peti ae ou te masalo o lea o le a ave e faapeti tele i tua i le faatauvaga lea o le a fai i ai.



Ae na o sina fautuaga lava i lau Afioga i le Minisita o Tupe sei silasila ane lava ona pei o le tele o manatu lea e agai i le tau aua o lea o le a faatauva. E le aafia foi oloa ia e i i lalo o le tulafono o pisinisi ma oloa e mafai ona faamatuu atu i e o lo o agai mai fafo. Po o le a se faautautaga, ae silasila ane i ai ona e mafai ona fesoasoani mo le aufaipisinisi lea o le a gafataulimaiina.

Ia ma le isi o oloa ia e faatau i lalo i i ona o le tele o oloa nei e le o aafia i lalo o le Price Control Board. O lea o le a faamatuu lava. Pe le agai i ai sina fesoasoani i i oloa lava ia e manaomia e le aufaifaatoaga ona fesoasoani mai lea o le Board i tau ia ina nei tei foi ua soona fetuunai i tua ona mafatia ai le aufaifaatoaga.

Pau lea o sina fesoasoani atu lau Afioga i le Fofoga Fetalai, faafetai lava.

**FOFOGA FETALAI:** Malo faafetai saunoa i le sui usufono mamalu. Ou te manatu ua maea saunoaga a sui usufono mamalu.

O le a avatu le avanoa mulimuli i le sui usufono mo Faleata Sasae.

**Tofa AVEAU TUALA LEPALE NIKO PALAMO (Faleata Sasae):** Faafetai i lau Afioga i le Fofoga Fetalai mo le avanoa. Faafetai foi i le Minisita ma le Matalagaluega i le faamalamalamaina o lenei Tulafono Tau Faaofi.

Ua ou tulai atu e fai sina manatu e faatatau i le vaega lea. E i ai lou manatu e i ai le eseese o le privatise ina ia maua ai se tupe i mea taitasi pei o mea ia na lau mai e le Afioga i le Minisita o Tupe. O le vaega lenei o le Faleoloa o Faatoaga, e i ai lou talitonuga e le o se vaega e naunau ai le tatou Malo ina ia maua ai se seleni pei ona saunoa foi le sui usufono mo Falealupo i le vaega lea. Silasila le mamalu o le fonu, o le tau lea e i ai nei le fetilaisa ma le vailaau ua tau le mafai e le aufaifaatoaga ona faatau i le taugata. Ae o lea e i lalo o le Malo le vaega lea o le Faleoloa o Faatoaga e tele le fesoasoani e mafai ona ave i ai. Ou te talitonu foi o le mafuaaga foi lea na ala ai ona aumai e le Matagaluega o Faatoaga e pei ona saunoa le Afioga i le Minisita o Tupe na ala ai ona aumai laupapa, moega, ona ua taugata le vaega lea i kamupani o lo o aumaia. O lea na taumafai ai e faamamaavega lea i le atunuu. E i ai la lou manatu.....

**FOFOGA FETALAI:** Malie le sui usufono o lo o saunoa sei tuu atu le avanoa i le Minisita o Tupe mo le faamalamalamaga.

**Afioga Hon Faumuina Tiatia Faaolatane Liuga:** O se mea e fia faasao. Ou te lei fai atu e taugofie laupapa, apa ma fao a le Faleoloa o Faatoaga. Na ou faapea atu a tasi le nofoaga e faatau uma ai au mea e laitiiti lau tupe e alu ai ae o le tau lava lea e faatau ai i e fuafua lava i le latou markup, it's a public body a le Malo ae le o toe aveva o se Faalapotopotoga e faalagolago mai ini subsidies e faia e le Malo. Ma lou faaaloalo lava.

**FOFOGA FETALAI:** Malo. Tulai mai le sui usufono mamalu e faaauau le saunoaga.

**Tofa AVEAU TUALA LEPALE NIKO PALAMO:** Faafetai i le Afioga i le Minisita. E pei o le agaga lena o le manatu na tuu atu, atonu o le mafuaaga

foi lea na ala ai ona faatino e le Matagaluega o Faatoaga po o le Faleoloa o Faatoaga lea vaega.

O le tagai atu i le vaega lea o le Agriculture, e i ai lou manatu e tai tutusa lava ma le turisi aua e tai tutusa lava vaega ia e lua ona o faatoaga e aofia uma ai le atunuu e maua ai se manuia o le atunuu. E i ai foi la le auala e mafai ai e le Malo.....

**Afioga Hon Le Mamea Ropati (Minisita mo Faatoaga ma Faigafaiva):**  
Lau Afioga i le Fofoga Fetalai.....

**FOFOGA FETALAI:** Malie le sui usufono mamalu ona o lea e taua le Matagaluega o Faatoaga, se i tulai mai lau Afioga i le Minisita mo Faatoaga ma Faigafaiva.

**Afioga Hon Le Mamea Ropati:** E fia fesoasoani atu i le saunoaga a le sui usufono atonu o lea e tau agai mai ma tau mea ia o faatoaga, aemaise foi nisi o sui usufono mamalu ua tuana'i. Masalo o lea e i ai le fenumiai i le tulaga lea.

O le faleoloa o faatoaga o le pisinisi, a o le Matagaluega o Faatoaga e le o se pisinisi. E le tutusa la le faleoloa o le pisinisi ma le Matagaluega. O lea na saunoa le Minisita, a aumai ni fesoasoani mai fafo, e le avea i se pisinisi. E moni lava o lea e tau ai faatoaga, ae le aumai se fesoasoani foi lea mai fafo ona ave lea i lalo o se pisinisi ae ave i le Matagaluega. O le mea foi lena e le mafai ai ona subsidize e le Malo ni mea i ina, leaga o le mea o le pisinisi. A pisinisi la, o lona uiga e tauva latou pei o isi pisinisi i fafo. A o le Matagaluega o le Matagaluega lea e aumai i ai fesoasoani a atunuu i fafo ma isi faalapotopotoga, o i ina la e tauala atu ai fesoasoani tuusao i faatoaga.

E pei foi la o tupe ia e maua mai i le Faletupe o le Lalolagi, o lea foi e fesoasoani mai i ai isi Agencies i fafo. O mea la na e tauala atu ai le fesoasoani i nai o tatou faifaatoaga, ae le mafai ona tauala atu i lalo o se pisinisi aua e tumaoti, e le o se Matagaluega.

O lau fesoasoani atu lea, o lea e tau maua atu le finagalo o le sui usufono, o lo o i ai le fenumiaiga lea e pei ona saunoa, faafetai.

**FOFOGA FETALAI:** Ia faafetai fesoasoani mai i lau Afioga i le Minisita mo Faatoaga ma Faigafaiva.

Tulai mai le sui usufono.

**Tofa AVEAU TUALA LEPALE NIKO PALAMO:** Lau Afioga i le Minisita, e faamalulu atu pe afai foi ua sese atu se faamatalaga i le Matagaluega o Faatoaga. E leai, o lea e agai sao lava i le Faleoloa o Faatoaga.

O le fesoasoani lea e saunoa ai le Afioga i le Minisita mo Faatoaga ma Faigafaiva, e le faapea e aumai i aso uma, e i ai vaitaimi ma e faavaitaimi. O lona uiga la, e le mafai ona oo i ai le fesoasoani i faifaatoaga i taimi uma lava. E le pei la o le vaega lea, e moni o le pisinisi ae leaga o le pisinisi lea e taumafai e fesoasoani i ai le Malo aua o lea e faatupe e le Malo isi vaega o le pisinisi lea. O le mea foi lena na ala ai ona tagai i ai le Malo i le vaega lea.....

**Afioga Hon Le Mamea Ropati:** Lau Afioga i le Fofoga Fetalai, se i ou toe tulai atu lava i le mea lea.

**FOFOGA FETALAI:** Malie le sui usufono, se i toe tuu atu le faamalamalama a le Afioga i le Minisita.

**Afioga Hon Le Mamea Ropati:** O le pisinisi lea o le Faleoloa o Faatoaga, e le avea i ai e se Malo se fesoasoani. Silasila i le tatou budget foi lea e fai nei i tausaga taitasi, e leai ma se tupe e ave i ai e le Malo. E galue lava latou e tau saili ni tupe. A manao i ni tupe e faaleleia atili ai, e fai loans ma mea faapena e tai pei lava o isi pisinisi. A o tupe uma ia a le Malo o lo o i totonu o le Tala o le Tupe, e agai i le Matagaluega o Faatoaga. O tupe la na e maua ai services ia e ave i tua i le aufaifaatoaga. O le mea lena o lea e tau faamatala atu, ina ne i te i ua fenumiai mea ia e lua. O lau fesoasoani atu lea ma le faaaloalo.

**FOFOGA FETALAI:** Malo faafetai fesoasoani mai. Tulai mai le sui usufono e faaauau le saunoaga.

**Tofa AVEAU TUALA LEPALE NIKO PALAMO:** Ia, o le a ma le fetalai ma le Afioga i le Minisita. A tagai le Afioga i le Minisita i le Tala o le Tupe i le tausaga na tea nei, o lena e i ai le \$600,000 na ave e le Malo i le faleoloa lea o faatoaga, na ave e totoi ai le aitalafu. Ou te le o iloa tele le aitalafu lea e i ai, pe a silasila i ai le Afioga i le Minisita i le Tala o le Tupe lea.

Ae ui i lea, o le a ou talanoa atu.....

**FOFOGA FETALAI:** Tulai mai lau Afioga i le Minisita.

**Afioga Hon Le Mamea Ropati:** Lau Afioga i le Fofoga Fetalai, e le o se tupe e ave e fesoasoani ai i ai. E tusa e tai pei lava o se loan po o se mea faapena. E le faapea o ave i ai ni tupe e toe faatau mai ai ni oloa e faaauau ai le faleoloa lea.

O lea e sau lava o lea e fenumiai lava le mafaufau o le sui usufono ma le mea lea e taumafai atu ai.

**FOFOGA FETALAI:** Malo; e manatu ua malamalama le sui usufono mamalu. E manatu o lea ua manino lou finagalo ma le auga o le faamoemoe, ae lafo atu ia e faaiu mai i se isi mataupu fou ma faaiu mai le saunoaga.

**Tofa AVEAU TUALA LEPALE NIKO PALAMO:** Ia, o le a le oo i ai aua o la e ese mai foi le manatu o le Minisita. Pe loan pe a, o le tupe lava a le Malo la e ave i ai. E ui i lea, o lou manatu la e pei ona taumafai atu ai lau Afioga i le Fofoga Fetalai, a tagai foi la i le Matagaluega lea o Tagata Tafafao Maimoa Mai lea e i lalo foi o le Malo, e tai taga tutusa lava vaega ia e lua. E eseese vaega ia o Tagata Tafafao Maimoa Mai ma Faatoaga, e ese mai la i isi kamupani ia e privatize tai pei o le Polenisia, o le vaega foi lea SPD ma isi vaega uma na.

**Afioga Hon Faumuina Tiatia Faoilatane Liuga:** Lau Afioga i le Fofoga Fetalai.....

**FOFOGA FETALAI:** Ia, malie le sui usufono o le a avatu le avanoa i le Minisita e ana le Tulafono Tau Faaofi.

Tulai mai le Minisita o Tupe.

**Afioga Hon Faumuina Tiatia Faaolatane Liuga:** Na ona fia faasao ma fia faamalamalama. E ese le STA ese le Faleoloa o Faatoaga. O le Faleoloa o Faatoaga e i lalo o le gallery o le trading body, a o le STA o auunaga e service ai le atunuu i ana faiga faatosina i tagata tafafao maimoa mai, ma lou faaloalo lava, e eseese.

**FOFOGA FETALAI:** Ia, malie lau Afioga i le Minisita o la e taamilo mamao mai le tau faamalamalama a le sui usufono mamalu. E fautua atu e tau faalatalata mai lou finagalo se i faagasolo le tatou Fono ona o lea ua latalata i le tatou taimi malolo.

**Tofa AVEAU TUALA LEPALE NIKO PALAMO:** Faafetai - o le manatu autu lava o lou nei sui usufono, o se fesoasoani lea e agai i le Ofisa o Faatoaga aemaise lava i le vaega lea o fertilizer ma vailaau.

A i ai se fuafuaga i lalo o nei vaega e mafai ai ona taatia le vaega lea i le Matagaluega o Faatoaga e fesoasoani ai i le atunuu, ona matagofie lea o le faatinoina o lenei vaega. Aua e pei ona silafia i le taimi lenei, e le o taofia lava se kamupani e alu e fai se faleoloa faapea, o la lava e i ai le avanoa e alu ai soo se tagata e faatu sona faleoloa e faatau ai mea nei. A o le auala tonu lea e fai ai le vaega lea ina ia faamatuu ese atu ma le Malo, ona o lo o i ai le talitonuga, o lea e le o lava se seleni e maua mai ai i totonu o le vaega lea. O lou manatu lea e tau tuu atu, e eseese vaega o mea e tatau ona faamatuu. O le vaega lea o se fesoasoani tele lea a le Malo e ave i le aufaifaatoaga.

Ua uma ai iinei se manatu o le sui usufono, faafetai lava.

**FOFOGA FETALAI:** Malo – se i tali atu le Afioga i le Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, o le mea lea e pei e le o maua mai e le Itu Agai.

O le soso ese o le Malo mai vaega ia e tele ai le avanoa mo le private sector e fai ai ni o latou sao. E le na o se tasi se faleoloa o lo o faatau ai oloa tau faatoaga, a o la e tele faleoloa ma e i ai foi le isi faleoloa e na o le pau lava ia o mea o la e faatau ai, o oloa tau faatoaga. O le faaauau ai la ma toe alu atu le Malo e feomia ai i o, o se mea ua matua le tatau ma o le mauagofie o mea ia, o le fesoasoani lava lena i le aufaifaatoaga, o le itu taua lena. O le mauagofie o oloa ia tau faatoaga, o le fesoasoani lava lena.

O lea ua atagia nei i le tele o a tatou fale o lea e maua mai ai mea ia, ua tau le o foi ma tagata i o i le faleoloa o faatoaga e faatau mai ai a latou oloa tau faatoaga. O lona uiga, ua atagia ai i ina e le tatau, le tatau ona toe faaauau lenei mea.

Lau Afioga i le Fofoga Fetalai, ua ou manatu ua matua manino lava le mataupu i lenei taeao.

**Afioga Hon Palusalua Faapo II:** Lau Afioga i le Fofoga Fetalai o se mea e fia faamalamalama.

**FOFOGA FETALAI:** Ia, o le a tuu atu pea le avanoa.

**Afioga Hon Palusalue Faapo II:** E tasi lava le mea lea e taumafai atu ai le Itu Agai, o le fesoasoani i le aufaifaatoaga. Pe gau le faleoloa ae ia maua le fesoasoani mo faatoaga, fetalaisa.....

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai, o le vaega lea.... o lea e pei e amuamu mai i le faleoloa i le gau. O le mea lena tou te mananao i ai, ia gau le faleoloa ona outou toe nonofo lea ma pei e amuamu mai i ai. Vaai la i le fetui o mea na tou te fai mai ai?

**Afioga Hon Palusalue Faapo II:** Lau Afioga i le Fofoga Fetalai o le mea e fia faasao.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** O le matua tele lava o le le fetui. Tou te mananao e gau, ae a gau foi la ona outou toe tutu mai foi lea i ina ma toe taufaifai mai i le Malo e fai mea gau? O le mea lea e tupu ia te oe, o le tu i luma, tu i tua, tu i luma, tu i tua. E le faapena ona fai le taitaiga o se Vaega. A e tu i luma, tu ai lava i luma, ae aua le tu i luma, tu i tua, oso i luma, oso i tua, oso i luma, oso i tua. O le mea lena o lea e tupu nei, na amata lava o fai mai, e gau, gau, gau? O le a le mea e ala ai ona gau? Ona o lea e tuu i lalo tau.

Lau Afioga i le Fofoga Fetalai, se ia malamalama le tagata i mataupu e lauga ai, ae le o le faapea le fetotoai, fetotoai, luma, tua, luma, tua.

**Afioga Hon Palusalue Faapo II:** Lau Afioga i le Fofoga Fetalai ma le faaalalo, e le o tu i luma tu i tua. Ona pau lava le tu a le Itu Agai, ia maua le fesoasoani mo le aufaifaatoaga. O lea e ave le CSO i le EPC, o le a le mea e le ave ai i ai le GST?

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** A o ni paupau le mea lea e fai? O le a lea mea e fai i faatoaga? E leai se mea o tatou faia mo le aufaifaatoaga? O le mea lena e leaga ai o lena ua avatu le taavale ae e te le o toe oo e fai sau faatoaga, ae na o lou fealualuai solo i inei i Apia?

**Afioga Hon Palusalue Faapo II:** Lau Afioga i le Fofoga Fetalai.....

**FOFOGA FETALAI:** E manatu le Taitai o le Itu Agai se i fai atu le tala lea a le Nofoa. O lea e maitau atu e le Nofoa tiuga ma saunoaga i lenei taeao, e manatu foi e le aofia matagi i se faamatalaga leaga o lea e saunoa foi nisi o lena itu ma tautalagia le gau. O le ala foi lea o le taumafai atu o le Malo e tau talitali atu i le mafuaaga ina ia aua ne'i gau, a o lea foi e te augani mai ina ia fai pea ia gau. Ona atagia ai lea e pei e.....

**Afioga Hon Palusalue Faapo II:** Lau Afioga i le Fofoga Fetalai, o le mea e fia faasao.

**FOFOGA FETALAI:** Malie se i uma le mea lea ona ou fai atu lea.

**Afioga Hon Palusalua Faapo II:** Leaga o lea e tatau ona faasao lau saunoaga.

**FOFOGA FETALAI:** Faatali se i uma ona ou fai atu lea. Nofo i lalo. Alaala mai i lalo o lea e fai atu le itu lea. E te le faasao le Nofoa.

O lea e tau faamalamalama atu a outou tuleiga ma saunoaga lea e fai mai i le taeao leaga e mau eseese la outou pito. O lea e taumafai le Malo e talitali atu i le tulaga e faavasega ma faatulaga le mataupu, a o lea lava e te tu ma e augani lau Afioga e te manao e faasao pea lau saunoaga.

Malie sui usufono mamalu, o lea lava tatou te agai i le tulaga o le faamalamalamaina o le mataupu, a o fea e aga i ai la outou fautuaga, ona ave lea o lea ua saunoa ma manino. Ua fia sefulu taimi o soalaupule lenei mataupu ma faaagaga i le Tulafono e tatau ona i ai le Kapeneta. O lea la ua tuu mai, ave lea o le tuualalo e talafeagai ai.

E manatu ona o lea ua tatou taunuu i le tatou taimi malolo, o le a faataatia ese Tualumaga a le Fono Aoao mo lana malologa masani o le taeao.

*Na faataatia ese Tualumaga a le Fono Aoao i le itula e 10:44 i le taeao mo lana malologa masani ma toe faaauau i le itula e 11:17 i le taeao.*

**FOFOGA FETALAI:** Ou te faasilasila atu ua toe amatalia nei Tualumaga a le Fono Aoao Faitulafono.

E i ai le talitonuga ua maea ona palegaaau le taliga o le sua, ma e talitonu foi ua maua se faasiliga malosi i le tatou Fonotaga i leni taeao e faaauau ai a tatou galuega. E i ai le talitonuga o le tatou aso fono mulimuli leni. E manatu e tatau ona papa-aveloa a tatou galuega mo leni aso. E momoli atu le faafetai tele i le paia ma le mamalu o le tatou au fono i sui usufono mamalu uma o le Maota, aemaise o le faafogoga tapuai mai a lo tatou atunuu.

A o le i toe amataina le Tualumaga, e tatau pea ona avatu le faasilasilaga a le Nofoa ona o le tulaga i le tau tataoina ma le faamautuina o le tatou va nonofo, aemaise o le tatou vatapuaia i totonu i le faagasologa o galuega o le aso. O lea e toe tuu atu ai pea le tuualalo i le paia ma le mamalu maualuga o sui usufono o saunoa ma fetuunai ma fetufaai i taimi o felafolafoaiga, ae faapito augafa se faamatalaga i lau Afioga i le Taitai o le Itu Agai ma lea Itu o le Maota. E manatu e le na o tatou o tatou fono talatala, o lea e faafogafoga le tatou atunuu. Ona i ai lea o le talitonuga, o le Maota ua uma ona paleauau ma palelaei, ua uma foi ona ta mamani i paia, o sa ma faiga, o paia i Aiga ma Faleupolu o le atunuu. E manatu ai e le toe aoaia e Laupua Tamafaiga. O a suaga o le vaatele ma le tatou Fono, ia, tau ina ia tausisia le tatou va nonofo ma le tatou va tapuaia ma le tatou va feagai ai. O a foi tulaga o le suaga o le vaatele ma le aulapauta ma le aulapatai, ia, ou te lagona e le te i gofie le tofa loloto ma le faautautaga oo. O lo o mau iumaea ma uumi too o outou sa tatou te tootoo ai i tai loloto ma tau louloua. A tulai mai loa o le a tuliaupu pe manatu le tagata ia e tuli lona sao, ona ave lea ma mea e sese ai i nisi o taimi.

Ua ou tapa lea tulaga ona o le tatou va nonofo ai ma le Nofoa, ia outou alofagia, e le o i ai se tulaga o se fia niuali pe fia tagata iloa pe faasiliaupule, leaga e maualuga i le Fofoga Fetalai lo tatou va nonofo ma le va tapuia, le va fealoaloai lena o lo o tausii ai le fonousu a le atunuu. A o le a foi sa outou faafogafoga i le taumafai atu, ia, o le tau tata lava i le moa o le ala leaga a felelei loa manusina ua sa manuvale. A ta foi le fuesina, ona faaaloalo lea o fueafa.

Ona ou talitonu lea i le maitau mai lava i fatia ua sola ma aso ua alu, o lea lava e taumafai atu le Fofoga Fetalai ae paga lea o lo o atagia pea nisi e le o amanaia le taumafai atu. O le agaga moni ia tausisia a tatou Tulafono Tumau ma ia tausii pea le tatou va nonofo ma le va fealoaloai. A fai atu loa le faatonuga i luga nei o lou taumafai atu ina ia taatia i lagatonu se mataupu, ona alofagia lea e sui usufono o lo o tulei ma saunoa, ia outou alofagia le faatalauala atu a le Nofoa.

O le faasilasilaga lea ma le ava ma le faaaloalo ina ia aua ne i toe tulai mai, ma ia tausisia ona o lea foi e filogia le Maota i alo ma fanau a le atunuu o lo o omai e silasila ma maimoa. Ou te manatu o le Maota lena o le faata mo le lumanai, tatou te tutu i le too ma tepa i le ata i tu ma aga a Taitai e taitaia le atunuu mo le lumanai. O le ala lea ua le mafai ai ona ou taofia le mataupu lena ina ne i maitau mai le atunuu ua tafefea pulu i vai i manatu ma lagona, ae ia taatia i lagatonu mataupu uma tatou te tulei saunoa ai, aemaise o le tausisia o le mamalu o le Maota.

O le faasilasilaga lea ma le ava ma le faaaloalo tele. Tulai maia lau Afioga i le Minisita e a ia le Tulafono Tau Faaofi.

**Afioga Hon FAUMUINA TIATIA FAAOLATANE LIUGA:** Lau Afioga i le Fofoga Fetalai, faafetai tele mo le avanoa ua maua e toe faamalamalama ai nisi o mataupu e le i faamalamalamaina i fatia ua sola.

Ou te iloa e muamua lau faamalamalamaga i le Tulafono Tau Faaofi o lo o faagasolo nei i le faataapeina i le Tulafono Tau Faaofi e pei ona tuuina mai i luma o le Maota o le Palemene o Samoa. O le Tulafono o le 2001, le Public Bodies Act, o le Tulafono lena na faafoe ai le Faalapotopotoga lea. Ma o lena foi Tulafono e operate lava le pisinisi po o le Faalapotopotoga o le pisinisi. E leai se faalagolagomaga i le Malo i ana tupe maua. E pei la o le aotelega lena.

O saunoaga a sui usufono mamalu e uiga i lena Tulafono Tau Faaofi ma le agaga na fai ai, o lo o manino le tali atu i lalo o le Fuaiupu 6 o lo o taua ai le faaauauina pea e se kamupani o le a manumalo i tauofoga i tulaga i maketi sa fai ai fefaatauaiga ma le Faleoloa o Faatoaga o lo o i ai i le taimi nei. O lona uiga e le mafai ona suia sootaga i fefaatauaiga ma kamupani sa aumai ai a latou oloa e faapena foi i le faatauina atu.

Sa fesiligia foi e se tasi o sui usufono mamalu le tulaga e le tata ai ona tuuina atu i se tagata se toatasi le faatauina o lena kamupani. A silasila le sui usufono mamalu i lalo i le Fuaiupu 5(1), o lena e fai mai ai, e le agavaa se tagata se toatasi i le tauvaga po o le tauofoga e faatauina ai le kamupani. E manino lava. O lona uiga ia aua ai ne i i ai se tulaga e monopolise ai e se toatasi tau o oloa, aua e afaina ai tatou le aufaifaatoaga aua e lavea ai le toatele o i tatou i lena Maota faatasi ai ma Samoa o lo o faafogafoga mai. O le tulaga lava lena ina ia faigofie ona maua oloa ma ia faapena foi ona maua i le tau e mafai ona faatauina ai.

I le tulaga lava i le upu o lo o faaaoga o le faataape, ia leaga e le o afio mai le sui usufono, o lea lava e sao le upu o lo o faaaogaina o le faataape, e pei foi ona faataape o le Palemene pe a oo i le taimi e maea ai lana Paeaiga, e faapena foi i le tulaga e tatau lava ona faataape le Faalapotopotoga ma ia faapena ona faatulafonoina ai le tuuina atu o ana matafaioi i le tulaga e pei ona tuuina mai.

O le fesili sa tuuina mai o aseta ma aitalafu ma tupe teu o lo o manino lava i lalo o le Fuaiupu 6(d) le tulaga lea i aseta, se i vagana ai mea pei ona faamalamalama atu, o le fanua ma le fale, o le a faapena ona fai i ai le fuafuaga a le Kapeneta mo le lisiina atu ma le tau e faamatuu atu ai ia aseta a le Malo e faaauau ai tulaga e pei ona i ai.

O se fesili foi e tatau ona fai se option mo le aufaigaluega, ia o mean a e pei ona i ai, o lenei e manino i lalo o le Fuaiupu 7, o le Tulafono e fai ai e le Kapeneta faaiuga talafeagai mo le tauofoga ae le gata i lea o le puipuiga lava o aseta aemaise foi o le mamalu o le atunuu o lo o faigaluega ai.

Sa i ai foi se finagalo sa taua ai le tatau ona tuuina atu nisi o nei oloa i le vaega a le MCIL ina ia faaaoga o se tulaga foi lea ina ia mafai ai ona taofiofi le tau o oloa aua le soona siitaia tele. E manaia le fautuaga, ae afai e le o i ai le vaega lea i le lisi o lo o i ai nei, o lea ua faalogologo atu ma e talafeagai, ma o le a faapena foi ona tuualalo i le Afioga i le Minisita ma lea foi Matagaluega mo le aloaia o lenei faamoemoe.

O le tulaga lava ia i le faatinoga o lenei galuega e pei ona a maea se finagalo o lenei Palemene i lenei Tulafono Tau Faaofi, ona soloia loa lea o le Tulafono o lo o i ai nei o le 1975, ae faagasolo taualumaga o le Tulafono Tau Faaofi e pei ona i ai nei. Faafetai tele i lau Afioga ma sui usufono mamalu o lenei Palemene. Soifua.

**FOFOGA FETALAI:** Malie lava, ia sa tuu atu lava e saausi le saunoaga a le Afioga i le Minisita.

Tulai mai le sui usufono po o i ai se mea o pau.

**Afioga Toeolesulusulu Cedric Pose Salesa Schuster:** Faafetai i lau Afioga i le Fofoga Fetalai mo le avanoa. E leai, atonu e mau eseese se taofi ma le faamalamalama a le Afioga i le Minisita. E pei o le vaega lea sa faafesili atu ai i le Fuaiupu 5 e pei ona e taua. O lau faitau i ai i le Tulafono Tau Faaofi, e faasa ona i ai se tagata toatasi e mafai ona faatu atu i ai, ae o lona uiga e faataga oe i se kamupani e mafai ona latou monopolise ina ona tauva ma maua e le kamupani lea. E pei o le faafesili atu lea ona o lea e faasa mai na o le tagata e toatasi, one person ae faataga i se kamupani ona latou monopolise ina ma latou taufofo ma mauaina le... Afai la o se faataitaiga o se kamupani e na o latou se kamupani o lo o faapea ona auai i se...

**FOFOGA FETALAI:** Ia, o lea ua maua atu, se i tuu atu le avanoa e tali mai le Minisita.

**Afioga Hon FAUMUINA TIATIA FAAOLATANE LIUGA:** Lau Afioga o lea ua maua atu. Ou te iloa ana silasila le sui usufono i lalo o le Fuaiupu 7 o lenei e i ai tuutuuga, "E mafai e le Kapeneta ona faamaonia ni tuutuuga talafeagai mo le faamamaluina atoatoa o le faagasologa o tauofoga ma le



faafoeina lelei o sea faagasologa.” E faamaea ona tagofia e le Kapeneta. Ma lou faaaloalo lava.

**FOFOGA FETALAI:** Malo faafetai. E manatu ua malamalama lea mataupu. E malamalama atili pe a tatou oo i le iloiloga auiliili.

*Na faamaonia le lafo ma faitauina le Tulafono Tau Faaofi e Soloia ai le Tulafono o le Faalapotopotoga o Oloa Tau Faatoaga 2013 i lona faitauga faalua.*

**TULAFONO TAU FAAOFI E SOLOIA AI LE TULAFONO O LE  
FAALAPOTOPOTOGA O OLOA TAU FAATOAGA 2013  
– iloiloga auiliili**

**FOFOGA FETALAI:** Talu ai ona ua ou taulimaina nei le Tusi Faamaonia o le Tulaga Faanatinati, ua maea foi ona sainia e Lana Afioga Mamalu O Le Ao o le Malo le Tulafono Tau Faaofi lenei, o lea o le a sagai atu loa le Fono Aoao Faitulafono mo le iloiloga auiliili.

E tusa ai ma le Tulafono Tumau 102, e amata le iloiloga auiliili o le Tulafono Tau Faaofi i le Fuaiupu 2.

**FUAIUPU 2: Faataapega o le Faalapotopotoga.**

*Faamaonia.*

**FUAIUPU 3: Aloaia o le tuufaatasia faaletulafono.**

*Faamaonia.*

**FUAIUPU 4: Faaliliuina ma le tuuina atu o aseta, ma isi mea faapena.**

*Faamaonia.*

**FUAIUPU 5: Pulea toatasi.**

*Faamaonia.*

**FUAIUPU 6: Aiaiga tau soloaiga ma aiaiga faasaoina.**

*Faamaonia.*

**FUAIUPU 7: Tuutuuga.**

*Faamaonia.*

**FUAIUPU 8: Soloia.**

*Faamaonia.*

**FAAMATALAGA:**

*Faamaonia.*

**FUAIUPU 1 MA LE IGOA:**

**FUAIUPU 1: Igoa puupuu ma le amataga.**

**IGOA: Tulafono e Soloia ai Tulafono o le Faalapotopotoga o Oloa Tau Faatoaga 2013.**

*Faamaonia.*

*Na faagasolo le Tulafono Tau Faaofi e Soloia ai le Tulafono o le Faalapotopotoga o Oloa Tau Faatoaga 2013 e aunoa ma se Teuteuga.*

**FOFOGA FETALAI:** Ia, e manatu o lea ua tatou taunuu i le siui o le tatou galuega i lenei aso, ma e i ai le talitonuga ona o nisi o tatou Tulafono Tau Faaofi Faanatinati ma ua manaomia vave e le Faigamalo ma le Pulega Malo na mafua ai ona faasolo le tatou Fonotaga.

E i ai le talitonuga ua tatou taunuu i le taunuuga o le tatou galuega i lenei aso. E momoli atu ai le agaga faafetai tele i le paia ma le mamalu o le tatou Fonotaga, ma e talitonu ua logo i tino matagi lelei i lenei aso ona o le tatou faamoemoe e pei ona i ai. Ma e i ai le talitonuga a o le i tuuina atu le faamoemoe i le pasiaina o lenei Tulafono Tau Faaofi i lona faitauga faatolu, ona ou lagona ona fai ai lea o se tatou malologa mo lenei taimi seia tolopoina le tatou Fonotaga, se i tatou aulia le aso Fono e sosoo ai. Ae momoli atu le faafetai tele i le paia ma le mamalu o le tatou Maota, i le tofa faaali ma le tofa saili na matimati ai lenei aso. E talitonu ua tau i manu le faamoemoe ona o le faatasi mai o le Agaga Paia o le Atua. O lea ou te tatalo atu ai i le Minisita o Tupe ina ia faatuina le lafo mo le faitauga faatolu o lenei Tulafono Tau Faaofi.

**TULAFONO TAU FAAOFI E SOLOIA AI LE TULAFONO O LE  
FAALAPOTOPOTOGA O OLOA TAU FAATOAGA 2013  
- faitauga faatolu**

**Afioga Hon FAUMUINA TIATIA FAAOLATANE LIUGA:** Lau Afioga i le Fofoga Fetalai out e faatu le lafo, *Ina ia faitauina nei le Tulafono Tau Faaofi e Soloia ai le Tulafono o le Faalapotopotoga o Oloa Tau Faatoaga 2013 i lona faitauga faatolu.*

*Faaluaina e le Sui Palemia, Minisita mo Tina ma Tamaitai, Atinae o Nuu ma Afioga ma Agafesootai ma le Minisita mo le Soifua Maloloina.*

*Na faamaoina le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.*

**FOFOGA FETALAI:** O le a tatou tatalo ia i le Atua aua lenei faamoemoe o le Matagaluega aemaise le Malo ina ia tau i manu lenei Tulafono Tau Faaofi taua aua le faamatuu atu o se tasi lenei o Faalapotopotoga tele a le Malo ina ia manuia ai i le lumanai.

A o le i malolo le Fono, ou te tatalo atu ma le faaaloalo tele i le sui usufono mamalu mo Faasaleleaga Nu.3 e tulai mai e fai le tatalo faaii ona tatou malolo ai lea.

**Tatalo.**

*Na tolopo Taulumaga a le Fono Aoao i le itula e 11:37 i le aoauli seia aulia le itula e 9:00 i le taeao o le Aso Lua, 8 Oketopa 2013 e tusa ai ma le Polokalame o Fonotaga a le Palemene 2013.*